

Simo elaa ya Yesu Klisto eya imolaka Matiye

Maphoo ma etatele

O Simo Elaa ya Matiye tomozwa ndongo iinene ya Simo Elaa bo waeyimolaka Malako.

Kasi Simo Elaa ya Matiye embi kula kyese ne na bwikye na Simo eyaaka Malako.

O Simo ya Matiye tomozwa maphoo mama:

- Matiye 1-2: Bankoko ba Yesu na ibotama se
- Matiye 3.1-12: Mateya ma Yoane Mobatise
- Matiye 3.13-4.11: Ibatisama na imekama sa Yesu
- Matiye 4.12-18.35: Etoma ya Yesu o Galileya
- Matiye 19.1-20.34: Yesu amani o Galileya akye o Yelusaleme
- Matiye 21.1-27.66: Poso ya Yesu eya suka o Yelusaleme
- Matiye 28.1-20: Iakwa sa Yesu na iwenene se na baekosi

Simo Elaa ya Matiye, kyeweninya obokye Yesu ali Mokonzi ooyelese bato bee bokonzi pha Nwaphongo. Ambi kula baa na Moteye oobaphe mateya masengyesi na bee pho bahee manzoka oka bato baso.

*Bankoko ba Yesu
(Luka 3.23-38)*

1 Kyeka mankombo ma bankoko ba Yesu-Klisto: Yesu ali nkoko wa Davidi, na nkoko wa Abalayama.

2-11 Abalayama aboti Izake,
 Izake aboti Yakobo,
 Yakobo aboti Yuda na banaa nyango,
 Yuda aboti Pelesi na Zala nyango wa bée
 Tamala,
 Pelesi aboti Esilone,
 Esilone aboti Lama,
 Lama aboti Aminadaba,
 Aminadaba aboti Nasonε,
 Nasonε aboti Salamani,
 Salamani aboti Boaze (nyango yabaka Laaba),
 Boaze aboti Obede (nyango yabaka Luta),
 Obede aboti Yese,
 Yese aboti mokonzi Davidi,
 Davidi aboti Salomo (nyango yabaka ηwasi
 owa zalaka phanza na Uliya),
 Salomo aboti Loboama,
 Loboama aboti Abiya,
 Abiya aboti Asa,
 Asa aboti Yozafa,
 Yozafa aboti Yolama,
 Yolama aboti Azaliya,
 Azaliya aboti Yotama,
 Yotama aboti Akaza,
 Akaza aboti Ezekiya,
 Ezekiya aboti Manase,
 Manase aboti Amona,
 Amona aboti Yosiya,
 Yosiya aboti Yoyakime na banaa nyango
 imbele saakyekye bée na bato ba Isalayele
 o boombo pha Babilone.

12-16 O sima ya bokyεkye na bato ba Isalayεε
o boombo o Babilone,
Yoyakime aboti Salitiyεε,
Salitiyεε aboti Zolobabeε,
Zolobabeε aboti Abiudi,
Abiudi aboti Eliyakime,
Eliyakime aboti Azolo,
Azolo aboti Sadoke,
Sadoke aboti Akimi,
Akimi aboti Eliudi,
Eliudi aboti Eleyaza,
Eleyaza aboti Matane,
Matane aboti Yakobo,
Yakobo aboti Zozefu,
Zozefu moloo wa Maliya nyango wa Yesu,
okobangye bεε Masiya.

17 Tata oka Abalayama nono oka Davidi wali
ba yoo iko mbuka bane. Uta oka Davidi nono
wakyende bεε na bato ba Isalayεε o boombo o
Babilone, walekana ba yoo iko mbuka bane. Na o
itata imbele sasina tee nono o ibotama sa Masiya,
walekana ba yoo iko mbuka bane me.

Ibotama sa Yesu
(Luka 2.1-7)

18 Ibotama sa Yesu Masiya sabaka bobo:
Nyango Maliya abaka nwanwasi owa lukaka
Zozefu ilonga, kasi waaba bεε naino sa
bobutwakye o ingambi sonoso, Maliya aesi
ya ekama na nwiya nwa Bolobo Bosanto.

19 Moloo nye Zozefu abaka moto wa bosembo,
taikaka zinga imosambola o miyo ma bato, amba
ya kana imoleε obokye bato saeba.

²⁰ Wa baka yo kaumunya babona, anzelu monomō wa Nkolo amba motokolele o ndoto, amba ya wō ne obokye: «Zozefu, nkoko wa Davidi, saila ilonga Maliya, pho ibu siili ne, siuti na mwiya nwa Bolofo.

²¹ Amobota nwana wa lele, waa molaa nkombo Yesu. Eli yo moto owa mobikya bato bee na masumu ma be.»

²² Maphoo maso maamana makyelama pho ya ikokya yaawo Nkolo na munoko nwa moimosi we obokye:

²³ «Ngondo monomō amoekama, amobota nwana wa lele, baamolaa nkombo Emanuel.» Nkombo me kyelukye iwo obokye: «Iwaphongo ali na banga elele yonyo.»

²⁴ Waa umwa Zozefu, ambakyela nde bo wamowolekye anzelu wa Nkolo, nono wa longa yo Maliya.

²⁵ Kasi taika angana ne nono waabota yo nwana we, emba Zozefu amba laa nwana me nkombo ya Yesu.

2

Bato ba malondo baesi ya kyeka Yesu

¹ Yesu abotamaka o Betelēme ya Yuda, imbele saa baka Elode mokonzi. Nkolo me, banganga baakyekye banyaseesi, bautaka biitokolo munyēle. Bamba ya koma o Yelusaleme.

² Bamba ya tuna bee kye: «Iwana outi bee ifota, mokonzi nwa bayuda, ali bi? Toweneki nyaseesi we atokosi biye munyēle, emba toesi ya mokumbela.»

³ Waa oka mokonzi Elode simo mene, ndondo yamba baa ne, na bato baso ba Yelusaleme.

⁴ Amba ya banga bakonzi ba banganga ba Nwaphongo na bateye ba Mibeko, amba ya batuna elele'ye esengyesi Masiya ibotama.

⁵ Bamba mobuyisa bee kye: «O Beteleme ya Yuda. Pho moimosi wa Nwaphongo akoma boho:

⁶ «Ka we, Beteleme, mokyisi nwa Yuda, toli nwana mokyisi pha o nkyisi ya Yuda. Pho mokonzi munene owa mokanba bato banga Isalayele, amouta oka ya we.»»

⁷ Emba Elode amba ya banga bato ba malondo miibombo pho bamoimole imbele sa tokoloko nyaseesi me.

⁸ Sima amba ya batoma o Beteleme, amba ya wo na bee obokye: «Kyende okye mituna na mo na mo pho ya nwana, bo omoweni, oya nzimola pho na nga na kye mokumbela.»

⁹ Waa oka bee munoko nwa mokonzi, bamba ya kyende. Bamba ya wene nyaseesi owa wenekye bee phanza o mbale ekyetokolo munyele, kakye o boo pha be. Waakoma nyaseesi me o ikolo sa ele eeli nwana, nyaseesi me amba kye teme.

¹⁰ Bamba tonda na nkyisa waa wene bee nyaseesi me atemi.

¹¹ Baesi ya nyolo o ingambi, baweni nwana na nyango Maliya. Bamba kusama pho ya imokumbela, bamba ya ingola bayombo ba be, bamba mophe makabo mama: Wolo, mpaka na

mauta ma mile.* ¹² Sima Nwaphongo amba ya bawole o ndoto obokye bée sakula butwa yaaka Elode. Emba bamba ya butwa o mokyisi nwa bée mi nzela esuu.

Zozefu, Maliya, na nwana Yesu baloti o Ezipito

¹³ Waabutwa baa malondo, o sima, anzelu wa Nkolo monomo amba yelela Zozefu o ndoto, amba ya wo ne yokye: «Langwa, kpa nwana na nyango, lota o Ezipito, ikala omo nono waamowo nga na we obokye oya butwa. Pho Elode amoluka nwana pho ya imoboma.»

¹⁴ Nde na muna mokolo, Zozefu aesi ya teme, akpe nwana na nyango, amba yakye mibomba o Ezipito.

¹⁵ Abaka omo nono waawa Elode. Maphoo mamana makyelama pho ya ikokya maphoo maawoko Nwaphongo o munoko nwa moimosi we obokye: «Nabangyi nwana wa nga obokye amane o Ezipito.»

Elode abomi bana baakyiky

¹⁶ Waawene Elode obokye baamalondo bamokose, aokaka yoo ekusi. Amba ya toma batuluku o Beteleme na o nkyisi yaa mambale, babome bana ba bampele baso baali sakokya mbula ibale. Amekaka babona pho atangaka nkolo yaalekanaka tata waawenekye baamalondo nyasesi.

¹⁷ Maphoo maso mamana makyelama bo wawoko moimosi Yilimiya obokye:

¹⁸ «Baokyi ilela siute o Lama,

* **2:11 2.11** Mauta me mali ndokolo ngola ekyeingye bée bolekyele.

malelo na imiima sa ngongo.
Eli Layele kalele bana be,
taazingye obokye bamobondo pho bana bee
bawe.»

Zozefu, Maliya na nwana Yesu bamani o Ezipito

¹⁹ O sima ya iwaa sa Elode, anzelu wa Nkolo amba yelela Zozefu o ndoto o Ezipito.

²⁰ Amba ya wo ne yokye: «Teme, kpa nwana na nyango, butwa o Isalayele, pho baalukaka iboma nwana bawe.»

²¹ Zozefu amba ya teme, aesi ya kpa nwana na nyango, amba ya butwa o Isalayele.

²² Kasi waaoka Zozefu obokye Arkelaus abuto mokonzi nwa Yuda o elele ya ango Elode, amba lota ibutwa omo. Nwaphongo amba kula moteya o ndoto ndengye ekoyi yo ikyela, amba ya kyende o mokyisi nwa Galileya.

²³ Amba ya kye zala o Nazarete. Maphoo mamana makyelama pho ya ikokya maphoo maawoko baimosi ba Nwaphongo obokye: «Baamobanga moto wa Nazarete.»

3

Mateya ma Yoane Mobatise

(Malako 1.1-8; Luka 3.1-18; Yoane 1.19-28)

¹ Sima ya mambula, Yoane Mobatise akyekye o bokye pha Yuda, akyekye miteya bobo:

² «Bongola mandondo, pho bokonzi pha ikolo bokomi phenephe.»

³ Yoane, eli yo moto owa woko moimosi Isaya pho ye obokye:

«Moto monomo kaanwane onte ya bokye yokye: Nkolo kalukye iyaa: Omobongyisa nzela, tutola banaa manzela maakyiky yoo!»

⁴ Yoane abaka kalate etobu eya kyela bée na nkungye ya nyama na nkombo shamo, na nkamba ya lopho la nyama o mobimbi, abaka kaze nde ntete na maboo.

⁵ Bato ba Yelusaleme na bato baso ba Yuda na baa mokyisi mooli phenephe na ebale ya Yaladene, babaka bakye oka ye.

⁶ Baimolaka masumu ma bée o boo pha bato baso, Yoane abaka kababatisa o ebale ya Yaladene.

⁷ Waawene Yoane obokye Bafalisayi na Basadukayi baikye baye oka ye pho ababatisa, amba tata ibawole bobo: «Bee ibota sa nzo, oephe malondo ma ilota yoo ya Nwaphongo ekye ye nza?»

⁸ Weninya na bikyela obokye obongosi motema.

⁹ Le imiwole obokye: “Ekpele yonyo ete lokyele, pho Abalayama ali nkoko wa banga.” Pho naewole ngakye, Nwaphongo akokyi ibuya mabanga mama bana ba Abalayama.

¹⁰ Bambo bongye ikoko pho ya ikpete nkanga ya nzete; nwete munsu mote mobote mbuma ndaa, baamokpete, bamba movaka o nweya.

¹¹ Nga, naebatisa na maa pho ya iweninya obokye obongosi motema, ka ookoye o sima ya nga, amoebatisa na Bolobo Bosanto na ná nwenya. Yo andekyi na mwiya, sikyilongobana na pho ya imumanya bikoto.

¹² Aphisi enyengyele o maboko pho ya ikabola mbuma na nkata. Amobomba mbuma o bompende, kasi amotumba nkata o njwenya moote moozime.»

*Ibatisama sa Yesu
(Malako 1.9-11; Luka 3.21-22)*

¹³ Mokolo monomo Yesu autaka o Galileya aesi o Yaladene, amba ya koma ooli Yoane pho abatisame.

¹⁴ Kasi Yoane amba le, yokye: «Eli nde we moto okokakyi imbatisa, emba kombe kula yaa oka nga ndengye'ye?»

¹⁵ Kasi Yesu amba ya mobuyisela yokye: «Anola obokye wataa baa babona pho ya unwanwa eye. Pho tosengyesi ikokya maphoo maso mazingaka Nwaphongo.» Emba Yoane amba ya anola.

¹⁶ Waunva Yesu izwa batisimo, amba abwa o maa. Nde mina wamo, ikolo samba ingwa, amba wene Bolobo pha Nwaphongo boute ndokolo inkoto-njwenya siesi yauta mi yo.

¹⁷ Nwesi monomo njwamba uta o ikolo mowo obokye: «Oyo ali Nwana wa nga wa lozingo; nasepesi ne na boikye.»

4

*Zabulu amekyi Yesu
(Malako 1.12-13; Luka 4.1-13)*

¹ Bobele Bolobo amba ya kamba Yesu o bokye pho Zabulu amumekye.

² Omoo, Yesu akyelaka nkolo mako mane mobimba sazaa, emba Yesu amba ya oka nzala.

³ Zabulu amba ya wali yo, amba ya wɔ ne yokye: «Bo oli Nwana wa Nwaphongo, wɔ na mabanga mama ma butwe mapa.»

⁴ Kasi Yesu amba ya mobuyisa yokye: «O buku pha Nwaphongo wakomama bofo: “Moto eta bikye nde na mapa, kasi na maphɔɔ masɔ maa wɔ Nwaphongo.”»

⁵ Emba Zabulu amba kye ne nɔnɔ o Yelusaleme, mokyisi mosantu, akye moteye o songye ya Tempelo,

⁶ amba ya wɔ ne yokye: «Bo oli nwana wa Nwaphongo, omikumbya o se; phɔ o buku pha Nwaphongo wakomama bofo: “Nwaphongo amoetomela banze be, ba moetamba phɔ ekolo ya we yango sazuma mi ifanga.”»

⁷ Yesu amba ya mobuyisa yokye: «O buku pha Nwaphongo wakomama bofo: “Sameka Nwaphongo Nkolo ya we.”»

⁸ Zabulu amba kula kyende ne o ikolo sa ngomba aanda, amba moteya makonzi masɔ maa se ná ngambo ya mango.

⁹ Amba ya wɔ ne yokye: «Namoephe iso miina bo onkusamesi phɔ ya inkumisa.»

¹⁰ Yesu amba ya wɔ ne yokye: «Molembe, mana wawa! Phɔ o buku pha Nwaphongo wakomama bofo: “Wamokumisa nde Nwaphongo Nkolo ya we, wamba na kyelela nde yo, moto mosuu phe.”»

¹¹ Bobele Zabulu amba ya mana wali Yesu. Emba banze bamba yaa waali Yesu, bamba tata imokyelela.

*Yesu atati etoma ye o Galileya
(Malako 1.14-15; Luka 4.14-15)*

¹² Waa oka Yesu obokye baakye Yoane o bɔlɔkɔ, amba kye o Galileya.

¹³ Amani o Nazaretɛ, kasi amba kye zala o Kapalanauma, mokyisi mooli o mokukulu nwa ebale ya Galileya, o manyetɛ ma Zabulonɪ na Nefetali.

¹⁴ Wakyelama baɓona phɔ ya ikokya maphɔɔ maawɔkɔ moimosi Isaya obokye:

¹⁵ «Manyetɛ ma Zabulonɪ na ma Nefetali, mopha nwa ebale eenenɛ, o mbale eyɔkɔ ya Yaladɛnɛ.

Galileya mokyisi nwa bato bate bali Bayuda!

¹⁶ Bɛ, bato baabakyi o enzɔmbi baweni munyɛlɛ nwa phɛlɛ!

Baabakyi o enzɔmbi ya mokyisi nwa bawe, munyɛlɛ mobatɔkɔlesi!»

¹⁷ Uta imbelɛ mɛ, Yesu abuto iteya ɓɔɓɔ: «Bongola motema, phɔ ɓokonzi pha Nwaphongo bokomi phɛnɛphɛ!»

*Yesu abangyi baekosi bane
(Malako 1.16-20; Luka 5.1-11)*

¹⁸ Yesu abaka kakye mitambula o mokukulu nwa ebale ya Galileya, amba ya wɛnɛ baɔsi ba swe baɓale, bola na mosii, Simo okobangye bɛɛ Petelo, na Andele nwana wa nyango, baɓaka bavakye ɓondɛndi.

¹⁹ Yesu amba ya wɔ na bɛɛ yokye: «Imbengye! Namobuya balukyi ba bato.»

²⁰ Mbala yɔnɔyɔ, baikiyi mandɛndi ma bɛ, baɓangyi Yesu.

²¹ Waamana Yesu wamō, akuli wene bato babale, bola na mosii, Zake na Yoane, bana ba Zebede. Babaka o vato na ango wa bée Zebede babongya mandendi. Yesu amba ya babanga.

²² Mbala yonoyō, baikyi ika vato na ango wa be, babengyi Yesu.

Yesu kateya, kambe na bikya bato

²³ Yesu atambulaka o Galileya mobimba; kakye miteya o mangambi ma makyita, kakye mimola Simo Elaa ya bokonzi pha Nwaphongo na ikyemibikya bato na malosi ma bée maso, na bileme ba bée biso.

²⁴ Ngambo ye ya tambulaka o manyete ma Siri mobimba, bamba moyelela na bato baso baabaka na malosi ndengye na ndengye na baabaka na matungyisi ndengye na ndengye; na baabaka na malobo mabe na baamaphukuluku ná bituku. Yesu amba ya babikya.

²⁵ Bato baikye bamobengaka; bautaka o Galileya, o Dekapolis, o Yelusaleme, o Yuda na o mokyisi mooli o mopa moyoko nwa Yaladene.

5

Yesu kateya o ikolo sa ngomba

¹ Waawene Yesu bato baikye wamō, aesi ya baa o ikolo sa ngomba, akye zala. Baekosi bée bamba ya susinya phenephe ne, ² amba tata ibateya bobo:

Yaakolo nkyisa (Luka 6.20-23)

³ «Nkyisa ili na baamiebe ofokye bali bakayee o mandondo,

pho bokonzi pha ikolo boli pho ya be!

⁴ Nkyisa ili na baalele,
pho Nwaphongo aabaɓɓɔɔ.

⁵ Nkyisa ili na baate bali na toko,
beɛ bamozwa mokyisi nwa lakyela Nwaphongo
bato.

⁶ Nkyisa ili na baali na phowa ya ikyela bolaa,
pho Nwaphongo amokokya phowa ya be.

⁷ Nkyisa ili na baaokye bato ngongo,
pho Nwaphongo abaoka na beɛ ngongo.

⁸ Nkyisa ili na baali na mandondo maakunywa,
pho bamowene Nwaphongo.

⁹ Nkyisa ili na baakyemiambya bose,
pho Nwaphongo aabaɓɓanga bana be.

¹⁰ Nkyisa ili na baanyokomɔ pho bakyele bolaa,
pho bokonzi pha ikolo boli pho ya be.

¹¹ Nkyisa ili na beɛ bo bato baetole,
baenyokolo bambe na ewole maphoo maso
maabe pho beɛ konzanole.

¹² Kumba, ba na nkyisa,
pho mbano enene kyeeziya o ikolo.
Pho banyokoloko baimosi ba Nwaphongo
baabaka phanza nde bomɔ.»

Mokpa na Tala

(Malako 9.50; Luka 14.34-35)

¹³ «Beɛ oli mokpa nwa mokyisi. Ka bo
mokpa mumani vale, bamokula mobuya vale
ndengye'ye? Temokuli ba na tina, baamovaka
o nze, bato baamokyita.

¹⁴ Beɛ oli saa ya mokyisi, mokyisi
nwaatongama o ikolo sa ngomba temokoyi
ibombama.

¹⁵ Tebaalosa tala pho ya iekukya na katini, kasi baeteye o ikolo sa mesa pho eweninya bato baso baali o ingambi.

¹⁶ Yango mena, osengyesi ilola o boo pha bato ndokolo tala pho bawene bolaa bookyele b̄e, emba baambe kumbela Ango wa b̄e ooli o ikolo.»

Mateya pho ya mibeko

¹⁷ «Saumunya obokye nga naya pho ya imanya mobeko nwa Mose na mateya ma baimosi ba Nwaphongo. Siika yaa pho ya imanya kasi pho ya ikokya.

¹⁸ Eli phele, na wo na b̄e, tee n̄n̄ wamumana ikolo na muse, ete bamanya lowo l̄n̄l̄ o mibeko, ebe na n̄wana itanga o mookyiki owakoma b̄e om̄o ete baamumanya.

¹⁹ Yango mena, na nza na nza okomanya n̄n̄ n̄wana mobeko o mokyiki, kambe nateya bato basuu bakyele bom̄, amoba moto wa mbomela o bokonzi pha ikolo. Ka iyo nzaa ookokumole mibeko kambe na teya bato basuu obokye bakyele bom̄, amoba moto wa boo o bokonzi pha ikolo.

²⁰ Na wo na b̄e, luka ikumola Nwaphongo ileka bookomokumole bateye ba mibeko na Bafalisayi, bo phe, otoonyo o bokonzi pha ikolo.»

Mateya pho ya yo

²¹ «Waunva oka ewole ya bankoko kyewo bofo: “Sa boma moto; moto oobomi moto, bateni ba malombe baamosambisa.”

²² Kasi nga na wɔ na bɛɛ boɔbo: Moto munso ookyesi nwebi yɔ, bateni ba malombe baamosambisa. Ka ootosi nwebi obokye: “Ebubusi!” ikyita siinene sa banganga ba Nwaphongo saamosambisa. Owa mowɔɔ na nwebi ne yokye: “Alemana!” ebongyi obokye bamovakye o nwenya nwa lifelo.

²³ Bokokye o mesa ma Nwaphongo phɔ ya ikye mophe ibonza, bo omɔ okye umunya obokye oli na lowɔɔ na nwebi na we,

²⁴ langya ibonza sa we imbale ya mesa ma mabonza, kyende naino okye bongye na nwebi na we, emba ombe ya ambya ibonza sa we oka Nwaphongo.

²⁵ Bo moto aephundi, bo bɛɛ ne kombe kyende oka ba zuzi, bongya ne wataaba bɛɛ o nzela. Bo phe, moto me amoeyambya oka ba zuzi, bamoetoma oka batuluku phɔ baenyɔsa o bɔɔɔ.

²⁶ Nde phele na wɔ na we: Otootɔkɔɔ o bɔɔɔ tee nɔɔ waamophuta we mbongɔ ya we esɔ.»

Mateya phɔ ya baphemba

²⁷ «Waunva oka bawɔ boɔbo: “Sakyela phemba na nwanwasi wa moto.”

²⁸ Kasi nga na wɔ na bɛɛ boɔbo: Moto munso ookyekyi nwanwasi wa nwebi phɔ ya imooka phowa, ambokyela ne phemba o ndondo ye.

²⁹ Bo ziyo sa we saa boloo si etome o ikyela bofe, osiphengɔɔ, osivakye itakye. Elekyi bolaa phɔ ya we ibungya enango yɔɔyɔ ya nzoto ya we na obokye baevakye muwosi o lifelo.

³⁰ Bo eboko ya we eya boloo kyeetome o ikyela fobe, oetene, oevakye itakye. Elekyi bolaa pho ya we ibungya enango yonoyo ya nzoto ya we na obokye okye muwosi o lifelo.»

Mateya pho ya iboma bolonga
(Matiye 19.9; Malako 10.11-12; Luka 16.18)

³¹ «Bakulaka wo bobo: “Bo lele ale njwasi we, asengyesi obokye amokomele mokanda moimole obokye bolonga bowee.”

³² Kasi nga nawo na bεε bobo: Moto munso ookole njwasi we, boteebe pho ya mibeko misuu miikatele bolonga me obokye bowe phe, mena atomise njwanjwasi me ikyela baphemba. Ka moto owamolonga njwanjwasi wa ndenge mena, akyesi phemba.»

Mateya pho ya ikata seleka

³³ «Wakulaka oka obokye bawoko na bankoko ba banga bobo: “Sakata seleka ya bole. Kasi kyela maphoo maso malakyi we bookatakyi we seleka o foo pha Nkolo.”

³⁴ Kasi nga nawo na bεε bobo: Sakata seleka nono njwana bokyii bobo. Ebe na nkombo ya ikolo, pho ikolo eli eziye ya Nwaphongo.

³⁵ Naa na nkombo ya munse, pho muse eli elele ekye teye yo makolo me, naa na nkombo ya Yelusaleme, pho Yelusaleme eli mokyisi nwa Mokonzi munene.

³⁶ Sakata seleka na moto nwa we, pho tokokyi ibuya suwe ya we ntane naa nsindo.

³⁷ Bo ee, wo obokye: “Ee”. Bo phe, wo obokye: “Phe”. Maphoo maso mabakya bεε o maamana maute na Molembe.»

Mateya pho ya ibuya bobo
(Luka 6.29-30)

³⁸ «Waoka bawoko bobo: “Ziyo pho ya ziyo; zino pho ya zino.”

³⁹ Kasi nga na wo na b̄e bobo: Bo moto akyesi bobo, samobuyisa bobo. Bo moto aewandi engyete o itama sa boloo, kula mophe saa bowee.

⁴⁰ Bo moto kalukye iyekamba o baloo pho ya iyebololo simisi, omolele na muna munkoto.

⁴¹ Bo moto aeyongyi na bokusi ikye moika o ebonga, kula lekana ne itakye na ebonga.

⁴² Bo moto aeyongyi ekpele, omophe; bo azingyi ibeka na we, omobekya.»

Izinga banguna
(Luka 6.27-28, 32-36)

⁴³ «Waoka bawoko bobo: “Zinga nwebi na we, ina munguna nwa we.”

⁴⁴ Kasi nga na wo na b̄e bobo: Zinga banguna ba b̄e, bondele pho ya bato baenyokolo.

⁴⁵ Emba waamba baa bakolo bana ba Ango wa b̄e Ooli o ikolo. Pho katokolo moo nwe na pho ya bato baabe na pho ya bato baala. Kanoya mbula pho ya bato bakyele bolaa na pho ya bato bakyele bobo.

⁴⁶ Bo kozingye nde bato baezingye, mbano ye eyamozwa b̄e oka Nwaphongo? Na baphutise ba mputi bakyele bomo!

⁴⁷ Bo kobeya nde bana nyango na b̄e, mena o kyesi lowo lolekyi? Phe! Na bato bate baebe Nwaphongo bakyele nde bomo!

⁴⁸ B̄e ba bato baala boli Ango wa b̄e owa ikolo molaa.»

6

Mateya pho ya isunga babola

¹ «Kyeβa na ndengye ekyekyelele βèε Nwaphongo. Samokyelela o miyo ma bato obokye baewenekye. Bo phe, otozwe mbano oka Ango wa βèε oli o ikolo.

² Waa kabele we mobola ekpele, sakyela obokye bato baewene bokyele banyamabole o mangambi ma makyita na o nsongo pho bato babakumisa. Nde phele, nawo na βèε ngakye: Baambozwa mbano ya βe.

³ Kasi bo eboko ya we eya boloo kyekabele mobola, kyela obokye eboko ya we eya bowee saeba.

⁴ Pho ikabo sa we sibee miibombo; emba Ōngo okowene mapho ma bombama amoeyuma.»

Mateya pho ya ibondele

(Luka 11.2-4)

⁵ «Bo kobondele, sa βaa ya bato βa βole; bazingye ikyemiteme o mangambi ma makyita na o nsongo pho ya ibondele pho bato baso babawene. Nde phele, nawo na βèε; baambozwa mbano ya βe.

⁶ Kasi iwe, bokolukye ibondele, nyolo o kolale we, ziba ekomba, βondele Ōngo oli o elele me eya ibombo, yo okowene iso ikyikyele we miibombo amoephe mbano.

⁷ Wa βondele βèε Nwaphongo, sa wo mapho maikye ndokolo bato bate baefe Nwaphongo; baumunya obokye Nwaphongo aabaoka nde bo bawo na boikye.

⁸ Sakyela ya βε, pho Nwaphongo, ango wa βεε, kaεbe iwaa iisengyesi na βεε, βεε naino sataa iyonga.

⁹ Kyeka βosengyesi βεε ifondεε:

“Ango wa banga ooli o ikolo, nkombo ya wε ebe esantu.

¹⁰ Bokonzi pha wε boyee; mokano ηwa wε mokyelame wawa o se ndokolo bokokyelame wango o ikolo.

¹¹ Olophe lolu ntoma iikokyi.

¹² Ololimbisa βobe bookyesi banga nde bokolimbisa banga βεbi βobe βolokyesi βε.

¹³ Salokamba o bimekyi; kasi olobikya o nσεε ya Molemba. [Pho bokonzi, mwiya na nkyεmɔ ili ya wε βobeε na βobeε. Amε.]”»

¹⁴ «Pho, bokolimbisa βεbi βobe βoekyesi βε, Ango wa βεε ooli o ikolo amoelimbisa mε.

¹⁵ Kasi βo olεε ilimbisa βεbi βobe βoekyesi βε, Ango wa βεε etaelimbisa βobe bookyesi βεε mε.»

Mateya pho ya imiima ntoma

¹⁶ «Waamiime βεε ntoma, samikyela ngongo bokokyele banyamabole, βakangye maboo ma βεε pho βato baso βawενε obokye βamiimi ntoma. Nde phεε, na wɔ na βεε, βaambozwa mbano ya βε.

¹⁷ Kasi wε, βo omiimi ntoma, kunyola βoo pha wε, βongya suwe na bolaa.

¹⁸ Pho βato saεba obokye omiimi ntoma; moto owaaloεba nde ɔngɔ ooli o elele ya ifombo. Emba ɔngɔ ookowενε maphɔɔ maali o mabombo, amoephε mbano.»

Ibomba ezwele o ikolo
(Luka 12.33-34)

¹⁹ «Sa bomba ezwele o mokyisi mumu. O mokyisi mumu, munse na mabembe bamoeyoto, baibi bamobuka maphungola pho ya ieyiba.

²⁰ Kasi bomba ezwele nde o ikolo oka Nwaphongo. Pho omō tewali munse, mabembe ma iyoto mbolo temali, na baibi baibuka mangambi tebali.

²¹ Pho elele eli ezwele ya we, ndondo ya we elangyi nde omō.»

Tala ya nzoto
(Luka 11.34-36)

²² «Miyo mali tala ya nzoto; bo miyo ma we mali na bolaa, nzoto mobimba ya mowene saa,

²³ Kasi bo miyo ma we mali na bolosi, nzoto ya we mobimba yamobaa o enzombi, otoowene ekpele. Nde bomō, bo tala eeli o ndondo ya we ebuto enzombi, enzombi me yamoba ekusi koleka.»

Nwaphongo náa baphalanga
(Luka 16.13)

²⁴ «Moto mōnōmō takokyi ibaa moombo wa bankolo babale; naa amoina mōnōmō, amba zinga oomoyoko, naa amotosa mōnōmō amba tiyola oomoyoko. Tokokyi ibaa na mbala yōnōyo moombo wa Nwaphongo na moombo wa baphalanga.»

Samitungyisa pho ya maphoō masengyesi na
βεε
(Luka 12.22-31)

25 «Yango mena na wo na b̄e ngakye: Samitungyisa pho ya iza na inywaa iisengyesi na b̄e pho ya ibika, naa pho ya bitobu biisengyesi na b̄e pho ya nzoto. Bomoo teboolekye ntoma? Nzoto te iilekye bitobu?

26 Kyeka manyosi, tebaaphikye, tebaanoko mbuma pho ya ibomba o mampende kasi Ango wa b̄e ooli o ikolo kabazeya. Emba b̄e toolekye manyosi?

27 Na bo omitungyise ndengye'ye, nzaa onte ya b̄e akokyi ibakya noko mokolo monomo o bomoo phe?

28 Ka pho ya'ye komitungyisa pho ya bitobu? Kyeka ndengye ekyetokolo ba phulele o manzabi; b̄e tebaakyele na etoma, tebaabambe na bitobu.

29 Kasi na wo na b̄e, ebe na Salomo, na ezwele ye eso, taikaka lata na bitobu biila koleka phulele noko yonoyo.

30 Taaumunya nkata iili lolo o inzabi, yana bakokyi iitumba o nwenya. Emba bo Nwaphongo ailasee babona, takokyi ilasa na b̄e? Pho ya'ye ianola sa b̄e sili sikyiky?

31 Sa mitungyisaka na iwo obokye: “Tomoza iye? Tomunywa iye? Tomolata iye?”

32 Kyemitungyisa na iluka iso miina nde bato baate baefe Nwaphongo. Kasi Ango wa b̄e oli o ikolo kaebe obokye osengyesi na yango.

33 Taaluka phanza Bokonzi pha Nwaphongo na ikyela maphoo maazingye yo. Emba amba phe iso iyoko iisengyesi na b̄e.

34 Sa mitungyisa pho ya yana, yana yango mampeza yaamitungyisa na maphoo ma yango.

Mokolo na mokolo moli na nkaka iikokyi na ηwango.»

7

Satenela nwebi bolombe (Luka 6.37-38, 41-42)

¹ «Satena bolombe mi mofesi ηwa moto, pho Nwaphongo nde aetenesi bolombe mi mofesi ηwa b̄εε.

² Pho Nwaphongo amoekyeka bookokyekye b̄εε b̄ebi, amoekyela bofe naa bolaa nde bookokyele b̄εε b̄ebi.

³ Pho ya'ye kowene mungalala mooli o ziyo sa nwebi na we kasi toowene ibaya siili o ziyo sa we?

⁴ Kowo na nwebi na we obokye: “Le naemanya mungalala mooli o ziyo sa we.” Okokyi iwɔ babona ndengye'ye pho o ziyo sa we ibaya sili, kasi kosiwene nde pha.

⁵ Nyaboolε, taamanya phanza ibaya siili o ziyo sa we, waamba wene na bolaa pho ya imanya mungalala mooli o ziyo sa nwebi na we.

⁶ Saphε manva mbolo iisantu, pho makokyi iyekpana ietwa; savaka bayaka ba motuya o boo pha mangulu, pho nde babakyiti.»

Ionga, iluka na ikomola mozibo (Luka 11.9-13)

⁷ «Onga bamoephε, luka wamozwa, komola mozibo bamozibola.

⁸ Pho moto munsɔ okoongye bamophε, ookolukye kazwe na ookokomole mozibo bamozibole.

⁹ Nzaa onte ya b̄ēe ookokyi iphe ηwana we ibanga bo amoongyi ipa?

¹⁰ Naa nzoo bo amoongyi swe?

¹¹ Bo b̄ēe bato babe koebe iphe bana ba b̄ēe mbolo iindaa, emba na Ango wa b̄ēe oli o ikolo takokyi iephe mbolo iilekyi bolaa boomongyi yango?

¹² Iso ikyizingye b̄ēe obokye baekyelele yango, na b̄ēe oikyelele bebi, kyeka iikyiloteya mibeko ma Mose na nkanda ya baimosi.»

Mozibo mookyiky
(Luka 13.23-24)

¹³ «Nyolo o mozibo mookyiky! Pho mozibo ηwa inyolo o mokyisi ηwa bawee moli munene ná nzela ekyekyende om̄o teeli na nkamba. Yango mena bato baikye baebengye.

¹⁴ Kasi mozibo ηwa inyolo o mokyisi ηwa bato bali na bomoo, moli mokyiky, ná nzela ekyekyende om̄o eli na mpika. Yango mena bato baezwe tebali baikye.»

Baimosi ba b̄ole
(Luka 6.43-44)

¹⁵ «Nde kokyebe na baimosi ba b̄ole! Baye oka b̄ēe balati lopho la mpate nzuka o motema nde mangoo.

¹⁶ Waabaeba na mobesi ηwa be. Tebaimbe mbuma ya vinyo mi nkaa naa mbuma ya fige mi ηwete ηwa milo.

¹⁷ ηwete molaa mobote mbuma ndaa, ηwete moobe mobote mbuma mbe.

18 Njwete moola temokokyi ibota mbuma iimbe naa njwete moobe temokokyi ibota mbuma iinda.

19 Njwete munso moote mobote mbuma ndaa, baamokpete, baamovaka o nwenya.

20 Yango mena, wamoeba baimosi ba boole na mobesi nwa be.»

Biwole na Bikyela

(Luka 13.25-27)

21 «Teli baawo na nga obokye: “Nkolo, Nkolo”, baamunyolo o Bokonzi pha ikolo, kasi nde baakyele maphoo maazingye Tata oli o ikolo.

22 Mokolo nwa moya sambisa nga mokyisi, bato baikye ba mowo na nga bekye: “Nkolo, Nkolo, tobaka baimosi na nkombo ya we. Totokoloko malobo mabe na nkombo ya we; tokyelaka bilekyesako biikye na nkombo ya we.”

23 Kasi nga namba wo na be ngakye: “Sieyefe, mana o boo pha nga be bato babe!”»

Mangambi mabale

(Luka 6.47-49)

24 «Yango mena, moto munso ookyi mateya ma nga ambi na matosa, ali ndokolo moto wa malondo ootongyi ingambi se o ikolo sa mabanga.

25 Mbula eno, maa matondi, ewele ekusi enyinyinye ingambi, tesiikyi uuwa pho basitonga o ikolo sa mabanga.

26 Kasi moto munso okookye mateya ma nga taambe na matosa, ali ndokolo ebubusi ootongyi ingambi se o ikolo sa musengye.

²⁷ Mbula eno, maa matondi, ewele ekusi eny-
ingyinye sina ingambi, siuwo siso siso.»

Bokonzi pha Yesu

(Malako 1.22; Luka 4.32)

²⁸ Waunva Yesu mateya mamana, bato baso
bakamwaka na moteyesi nwe.

²⁹ Pho taikaka baa kateya ya bateye ba mibeko,
kasi kateya na bokonzi bosu.

8

Yesu abikye moto ooli na bolosi pha maba

(Malako 1.40-45; Luka 5.12-16)

¹ Waaba Yesu kaute o ngomba, bato baikye
baamba ya mobenga.

² Emba moto monomo oli na bolosi pha maba
amba ya waali yo, aesi ya kusama o boo phe,
amba wo ne yokye: «Nkolo, bo ozingyi okokyi
iimbikya.»

³ Yesu amba ya elola eboko, amokumi, amba ya
wo yokye: «Nazingyi, bika!» Nde mina wamo,
maba me mamani.

⁴ Yesu amba ya wo ne yokye: «Oka na bolaa!
Saika loimola moto, kasi kyende kyemiteya oka
nganga ya Nwaphongo, oambya na ikafo bo wa
wo Mose; pho ya iweninya oka bato baso obokye
obikyi phele.»

*Yesu abikye mosali nwa mokonzi nwa
batuluku*

(Luka 7.1-10; Yoane 4.43-54)

⁵ Waaba Yesu kanyolo o Kapalanauma,
mokonzi nwa batuluku ba Loma amba yaa
ooli yo, amba ya nyingonela ne bobo:

⁶ «Nkolo, moto wa etoma wa nga alangyi o ingambi, taakokye ikula tambula, ali na bolosi boikye.»

⁷ Yesu amba ya wɔ nɛ yokye: «Nakyende, namokye mobikya.»

⁸ Mokonzi n̄wa batuluku amba mobuyisa yokye: «Nkolo, nga nali nza obokye onyɔɔ o ingambi sa nga? Kasi wɔ nde lowɔ lonɔɔ, moto wa etoma wa nga amobika.

⁹ Pho nga natosa bakonzi ba nga; nali na ná batuluku baantosa. Bo na wɔɔ na monɔmɔ ngakye: “Kyende!” kakyende, bo na wɔɔ na oomoyɔko ngakye: “Yaka!” kaye, na bo natomi moto wa etoma wa nga obokye: “Kyela bobo”, kakyele.»

¹⁰ Waaoka Yesu baabona, ambakamwa amba ya wɔ na bato baabaka bamobengye yokye: «Nde phele na wɔ na bɛɛ, naino siweni moto wa ianola ndengye eye onte ya bato ba Isalayele.

¹¹ Na wɔ na bɛɛ ngakye: Bato baikye bamouta biitokɔɔ munyele na biikye waa munyele, bamoyanyɔɔ o bokonzi pha ikolo, bamozaa o eseleko elele yonɔyɔ na Abalayama, na Izake na ná Yakobo.

¹² Kasi bato baabakyi bato ba Bokonzi pha ikolo, baabavaka o ifanda, o enzɔmbi, omɔ bamobutwa ilela na itwa mino.»

¹³ Emba Yesu amba ya wɔ na mokonzi n̄wa batuluku yokye: «Butwa oka ya wɛ, pho ya ianola sa wɛ, Nwaphongo aephe iso imoongyi wɛ.» Nde o sina imbele mɛ, moto wa etoma wa mokonzi n̄wa batuluku abikaka.

*Yesu abikye bato baikye baa malosi
(Malako 1.29-34; Luka 4.38-41)*

¹⁴ Yesu amba ya kyende o ingambi sa Petelo. Aesi ya kye zwa nyango wa njwasi wa Petelo alangyi ali na mowewe.

¹⁵ Amba mokuma na eboko, mowewe moesi ya mana, amba ya injwa abuto imokyelela.

¹⁶ Waakoma nkankolo, bamba yelela Yesu bato baikye baa malobo mabe. Yesu amba phaphala na mango, amba mitokolo, amba na bikya bato baso baabaka na malosi.

¹⁷ Akyelaka maphoo maso babona pho ya ikokya maloba ma moimosi Isaya waa wo yo obokye:

«Akpe bileme ba banga,
anyanye na malosi ma banga.»*

*Baazingye ibenga Yesu
(Luka 9.57-62)*

¹⁸ Waawene Yesu bato baikye bamolungye, amba ya wo na baekosi bée yokye toakale o ngambo eyoko ya ebale.

¹⁹ Nde o sina imbele me, moteye monomo wa mibeko amba yaa oli Yesu amba ya wo ne yokye: «Moteye, namoebenga mboka eso eya mokyende we.»

²⁰ Yesu amba mobuyisa yokye: «Manzumbu mali na bikakala, manyosi mali na moobo, kasi nga Nwana wa Moto sili na elele ya imilangya.»

²¹ Monomo na baekosi bée amba ya wo ne yokye: «Nkolo, inde naingyele taakye kunda tata.»

* **8:17 8.17** Yisaya 53.4.

²² Yesu amba ya mobuyisa yokye: «Imbengye, le bawee na bawee bakundane.»

*Yesu azibise Ewεεε na kanda
(Malako 4.35-41; Luka 8.22-25)*

²³ Bοβεε Yesu amba ya kpela o vato ná baekosi bέε baamba yakye ne molongo.

²⁴ Mbala yονοyο Ewεεε ekusi eesi yakyela o ebale, emba maa matati inyolo o vato. Kasi Yesu abaka na ebuu.

²⁵ Baekosi bamba ya susinya waali yo, baesi ya moumola bεkye: «Nkolo olobikya, tomowaa!»

²⁶ Yesu amba ya babuyisa yokye: «Bέε koile iye? Iyanola sa bέε sili sikyiky!» Emba amba ya ijwa, aesi ya phaphala na Ewεεε na maa nono waa ikala wango phio.

²⁷ Bέε baso bakamwaka bεkye: «Moto oyo ani baa nzaa obokye Ewεεε na kanda imotosa?»

*Yesu abikye bato baa malobo mabe
(Malako 5.1-20; Luka 8.26-39)*

²⁸ Waakoma Yesu o ngambo ya ebale, o mokyisi njwa Gadara, bato babale bautaka o malita, batokosi baesi ya vana ne. Bato me babaka na malobo mabe, babaka batombo na bokusi; yango mena bato tebakokaka ikula lekana mi nzela me.

²⁹ Bato me bamba butwa iyanwana bεkye: «Nwana wa Nwaphongo, banga na we lowo'ye? Ombo ya lotungyisa wawa naino imbele me sataa koka?»

³⁰ Nwana itakye na waali be, bokanda pha mangulu phabaka bokyemizaa.

³¹ Milimo mibe mamba nyingonela na Yesu bofo: «Boozingyi ilowiinya, olotome tokye nyolo o mangulu mamana.»

³² Yesu amba ya wɔ na bɛɛ yokye: «Kyendɛ kye nyɔɔ mi mɛ.» Milimo miɛ maamba tɔkɔɔ oka bato baabana, makyekye nyɔɔ o mangulu. Mbala yɔnɔyɔ, mangulu masɔ maesi ya uta o ngomba, makyɛ mivaka o ebale.

³³ Bato baabaka babanza mana mangulu baesi ya lota nɔnɔ o lombo, bakye imola maphɔɔ masɔ maalekaa na bato baabaka na malɔɔ mabe.

³⁴ Emba bato basɔ ba mokyisi mɛ bamba tɔkɔɔ phɔ ya ikye vana na Yesu; waamowenɛ bɛ, bamba moonga obokye amane o mokyisi nwa bɛɛ.

9

*Yesu abikye moto owa ɔtɔnɔ makolo
(Malako 2.1-12; Luka 5.17-26)*

¹ Yesu amba kpela o vato, amba kula katisa ebale, aesi ya kyendɛ o mokyisi nwe.

² Bamba moyelela na moto mɔnɔmɔ owa ɔtɔnɔ makolo alangyi o itɔkɔ. Waawenɛ Yesu ianola sa bɛ, amba ya wɔ na moto owa ɔtɔnɔ makolo yokye: «Nwana wa nga ititala! Masumu ma wɛ malimbisami!»

³ Emba bateye ba mibeko baamba ya butwa iwɔnɔ onte ya bɛɛ bekye: «Moto oyo katole Nwaphongo!»

⁴ Yesu aɛbaka maumunya ma bɛɛ amba ya wɔ na bɛɛ yokye: «Oli na maumunya mabe o mandondo ma bɛɛ phɔ ya'ye?»

⁵ Eli pha iwɔ obokye: “Masumu ma wɛ malimbisami”, nde iwɔ obokye: “Nwa tambula?”

⁶ Kasi nazingyi oebe obokye, Nwana wa Moto ali na bokonzi o munse mumu pha ilimbisa

masumu.» Emba amba ya wɔ na moto owa ɔtonɔ makolo yokye: «Injwa, kpa itokɔ sa we, butwa o ingambi!»

⁷ Moto me amba ya injwa nonɔ waabutwa yo o ingambi se.

⁸ Waawene bato babona, bailaka na boikye, bakumbelaka Nwaphongo phɔ apha bato bokonzi ndengye mena.

*Yesu abangyi Matiye
(Malako 2.13-17; Luka 5.27-32)*

⁹ Yesu aesi ya mana omɔ, waaba yo kalekane o nzela, aesi ya wene moto monomɔ nkombo ye Matiye azasi o elele ye ya etoma ekyekye be phuta mputi. Yesu amba ya wɔ ne yokye: «Imbengye!» Matiye amba ya teme amobengyi.

¹⁰ Waaba Yesu kaze o ingambi sa Matiye, baphutise ba mputi na bato ba masumu baikye babaka o mesa elele yonoyo ne na baekosi be.

¹¹ Waawene Bafalisayi babona, bamba ya tuna baekosi ba Yesu bekye: «Moteye wa be kaze elele yonoyo na baphutise ba mputi na na bato ba masumu phɔ ya'ye?»

¹² Yesu abaokyi amba ya wɔ na be yokye: «Bato bali na nzoto ndaa tebasengyesi na munganga, kasi esengyesi ne nde baali na malosi.

¹³ Kyende kye ekola ntina ya maloba makomama o buku pha Nwaphongo obokye: “Nazingye motema nwa iokyela bato ngongɔ, kasi mambeka ma manyama phe.” Phɔ siiki ya banga bato baala kasi naesi ya banga nde bato ba masumu.»

*Yesu kawo pho ya imiima ntoma
(Malako 2.18-22; Luka 5.33-39)*

¹⁴ Baekosi ba Yoane Mobatise bamba yaa ooli Yesu, baesi ya motuna bekye: «Banga na Bafalisayi tomiime ntoma mbala na mbala. Baekosi ba we tebaakyele bomo pho ya'ye?»

¹⁵ Yesu amba ya babuyisa yokye: «Koumunya obokye bato baabangyi be e o eseleko ya bolonga bakokyi iba na ngongo bo molongyi ali na be? Teli bomo! Kasi imbele sonoso waamumanya be molongyi onte ya be, emba bamba tata imiima ntoma.»

¹⁶ «Moto na monomo taapke etato ya etobu eenyakune pho aebambe na etobu eya boka, pho etato me ya mowawola etobu eya boka, iluu me samobutwa sinene.»

¹⁷ Tebaateye maleku maa swaswa o mambongo maaboka; pho bobakyesi babona, mambongo mamoboya, maleku mamokyende o se. Kasi bateye maleku maa swaswa nde o mambongo maanyakune pho maso mabatelame na bolaa.»

*Yesu abikye njwana wa njwanwasi na njwanwasi owa bolosi pha malongo
(Malako 5.21-43; Luka 8.40-56)*

¹⁸ Waaba Yesu kabawole babona, mokonzi monomo nwa bayuda amba ya mokusamela aesi ya wo ne yokye: «Nwana wa nga wa njwanwasi awe nde injanwa eye, kasi yaka, omotandele eboko, amobika.»

¹⁹ Yesu amba ya teme, aesi ya mofenga yo na baekosi be.

²⁰ Njanwasi monomo, abaka na bolosi pha itokolo malongo phaa koko mbula iko mbuka

ibale, aesi o sima ya Yesu, aesi ya kuma nsongye ya etobu Ye.

²¹ Pho amiwolekye yokye: «Bo nakye kuma nɔnɔ nsongye ya etobu Ye, namobika.»

²² Yesu amba ya miekola, aesi ya mowene, amba ya wɔ ne yokye: «Ititala, ηwana wa nga! Iyanola sa we siebikye.» Nde mina wamɔ ηwanηwasi me abikyi.

²³ Yesu amba ya koma o ingambi sa mokonzi me. Waawene yo batubi batube meembo phɔ ya iluka ikye kunda efembe, na bato baikye bambe kula lela na bokusi.

²⁴ Yesu amba ya wɔ yokye: «Tɔkɔlɔ, phɔ ηwana taikyi waa, kasi alasi nde ebuu.» Kasi bamba tata imoekye.

²⁵ Waatɔkɔlɔ bɛɛ bato basɔ o nze, Yesu amba ya nyɔlɔ o ingambi saabaka mowee, amba mophila o ebokɔ nɔnɔ wa inηwa yo.

²⁶ Simo me ya tambulaka mboka eso o mokyisi me.

Yesu abikye bato babale baaphɔlɔ miyo

²⁷ Imbele saa mana Yesu omɔ, waaba yo kalekane o nzela, bato babale baaphɔlɔ miyo baesi ya mobenga, bakye mi anηwana bekye: «Nkɔkɔ wa Davidi, olookye ngɔngɔ!»

²⁸ Waakoma Yesu o ingambi, bato baaphɔlɔ miyo baabana bamba yaa wali yo. Yesu amba batuna yokye: «Oli na ianola obokye nakokyi ikyela bomɔ?» Bamba anola bekye: «Ee, Nkolo.»

²⁹ Emba Yesu aesi ya bakuma o miyo amba ya wɔ yokye: «Waekyelamele boanosi bɛɛ!»

³⁰ Miyo ma βέε mabuto iwene, Yesu amba ya bakatela na bokusi yokye: «Oka na bolaa, moto mōnōmō saika eba lowo lolo.»

³¹ Kasi βέε βakyekye butwa iimola nde ngambo ya Yesu mboka esō.

*Yesu abikye moto owa mbubu
(Luka 11.14-15)*

³² Waaluka βέε ikyende, bamba yelega Yesu moto mōnōmō owa mbubu pho abaka na bolobō bofe.

³³ Waatokolo Yesu bolobō bofe me, moto owa mbubu abuto iwō. Bato baso bakanwaka bamba wō βekye: «Naino toloweni lowo la ndengye eye o Isalayele!»

³⁴ Kasi Bafalisayi bamba wō βekye: «Eli mokonzi nwa malobō mafe moto okomophe bokonzi pha itokolo malobō mafe.»

*Yesu aokyi bato ngongō
(Malako 6.6b, 34; Luka 10.2)*

³⁵ Yesu atambulaka o nkyisi iso inene na iinkyiky; abaka kateya o mangambi ma makyita, Simo Elaa ya bokonzi na ibikya bato ba malosi ndengye na ndengye na ná bileme ba βe.

³⁶ Aokaka ngongō iikye o ndondo ye pho ya boikye pha bato bawenekye yo, pho baphembekye, baengyebanaka ndokolo mampate mazangyi moβanze.

³⁷ Emba amba ya wō na baekosi βέε yokye: «Mbuma ili nzikye o inzabi, kasi bato ba iinoko tebali baikye.

38 Onga na nkolo wa inzambi atome bato ba etoma baikye pho bamunokyele mbuma.»

10

Batoma iko mbuka babale
(Malako 3.13-19; Luka 6.12-16)

¹ Yesu amba ya banga baekosi bée iko mbuka babale, amba baphe mwiya nwa itokolo malobo mabe na ibikya malosi ndengye na ndengye.

² Kyeka mankombo ma bana batoma iko mbuka babale: Owa boo Simo okobangye bée Petelo na nwana nyango Andele; Zake na nwana nyango Yoane, bana ba Zebede;

³ Filipe na Batelemi; Toma na Matiye moputise wa mputi; Zake nwana wa Alafe, na Taade;

⁴ Simo owa ingomba sa baatembetele mokyisi nwa be, na Yudasi Mosikaliota owa ungyaka Yesu.

Etoma ya batoma iko mbuka babale
(Malako 6.7-13; Luka 9.1-6)

⁵ Yesu amba ya toma batoma iko mbuka babale baabana; amba ya baphe mitindo mimi: «Sakyende o nkyisi ya babutu; sanyolo o mokyisi monomo nwa Samaliya.

⁶ Kasi kyende nde oka bato ba Isalayele pho babutwa ndokolo mampate mabungyi.

⁷ Waamoba bée o nzela, kyemiimola obokye: “Bokonzi pha ikolo bokomi phenephe.”

⁸ Bikyia bato ba malosi, akola bawe, bikya bato ba maba, tokolo malobo mabe. Ozwee pha, ambya pha.

⁹ Saphila wolo, na phalanga o makuba ma b̄ēe.

¹⁰ Saphila ikuba pho ya imbanga, na basimisi babale, saphila na mapapa, na motuu. Pho, moto wa etoma abongyi na mbano.

¹¹ Bo okomi o mokyisi monom̄o munene naa mokyiky, luka moto owa ndondo elaa, zala oka ye tee nono mokolo n̄wa mumana b̄ēe o mokyisi me.

¹² Bo onyosi o ingambi sonoso, wo obokye: “Bose bobe na b̄ēe.”

¹³ Bo bato ba ingambi me baeyambi, bose pha b̄ēe pha moba na be; “Ka bo tebaeyambi, bose pha b̄ēe pha moebutolela.

¹⁴ Bo o ingambi sonoso naa omokyisi monom̄o, bale ieyamba na ieyoka, lekana ombe lasa mobulubutu n̄wa makolo ma b̄ēe.

¹⁵ Nde phele na wo b̄ēe ngakye: Mokolo n̄waa mosambisa Nwaphongo bato, etumbu ya mokyisi mamuna yamoleka eya Sodom̄o na Gomola.”»

Minyoko maa moyaa

(Malako 13.9-13; Luka 21.12-17)

¹⁶ «Okyemela! Naetome ndokolo mampate onte ya mangoo. Yango mena obe na bokyengyi ndokolo manzoo, na bonyile ndokolo mankoto-nwenya.

¹⁷ Kyeba, pho bato bamosongyela oka bazuzi, bamoebinda phimbo o mangambi ma makyita.

¹⁸ Pho ya nga, ba mokyē na b̄ēe o boo pha bato baatebaebe Nwaphongo baeyokye.

¹⁹ Waa mokyē b̄ēe o boo pha bazuzi, b̄ēe saila pho ya maphoo masengyesi b̄ēe iwō, maphoo maamowō b̄ēe, wamazwa nde imbele me.

²⁰ Maphoo me ete maaute na b̄e, kasi Bolobo pha Ango wa b̄e pha mowoo onte ya b̄e.

²¹ Onte ya ibota, baná bamoungya banaa nyango na b̄e obokye bababome. Ba ango bamoungya bana ba be, bana bamoekpenela baboti ba b̄e pho bababome.

²² Bato baso bamoeyina pho ya nga. Kasi owa moititala tee nono o suka amobika.

²³ Waamoenyokolo b̄e o mokyisi monomo, lota o mokyisi mooyoko. Nde phele na wo na b̄e ngakye: Otootaa unva itambula o nkyisi iso ya Isalayele mena Nwana wa Moto sa boyakakye.

²⁴ Moekosi taalekye moteye we, moto owa etoma taalekye mokonzi nwe.

²⁵ Wa bongyi nde obokye moekosi abutwe booli moteye nwe, na moto wa etoma booli mokonzi nwe. Bo babangye mokonzi nwa ibota Belezebula, ka baná baamba babanga ba nza?»

Moto ookokyi b̄e ila

(Malako 8.38; Luka 9.26; 12.2-7)

²⁶ «Yango mena saila moto. Mokolo monomo moli, mowaa maphoo maso maabombama mamotokolo o nze, maphoo maazite b̄e mamoebana.

²⁷ Ikyiewole nga o enzombi, okule iwoo waa moo, ka ikyikolo b̄e na b̄e o itoo, o iwoo o ikolo sa motondo.

²⁸ Saila babome nzoto kasi te bakokyi iboma molimo, ila nde Nwaphongo ookokyi iboma na nzoto na molimo o lifelo.

²⁹ Tefaungya manyosi mabale maakyiky na motuya mokyiky? Kasi yonyo na mango teeka o se sa obokye Ono wa b̄e, Nwaphongo saeba.

³⁰ Pho ya b̄εε, eli nde bom̄o, na suwe ya b̄εε ango wa b̄εε Nwaphongo kaiyebe na motuya.

³¹ Yango mena b̄εε saila, pho oli na ntina koleka manyosi maikyē maakyikyī.»

*Ianola ndee ilēε Yesu
(Luka 12.8-9)*

³² «Moto okonzanole o miyo ma bato, na nga naamoanola o boo pha Tata ooli o ikolo.

³³ Ka moto owamunzangana o boo pha bato, na nga naamoangana o boo pha Tata ooli o ikolo.»

*Bose phe, kasi ebasi
(Luka 12.51-53; 14.26-27)*

³⁴ «Saumunya obokye naesi yaambya bose o mokyisi. Siikyī yaambya bose, kasi ebasi.

³⁵ Naesi pho ya iyakabola ηwana wa lele na ango, ηwana wa ηwanjwasi na nyango, ηwanjwasi wa ηwana na nyamolo nye.

³⁶ Nde phele, banguna ba moto ya moḃaa nde bato ba ifota se.»

³⁷ «Moto ookozingye nyango naa ango indeka nga, takokyī ibaa moto wa nga. Moto ookozingye ηwana we wa lele naa wa ηwanjwasi indeka nga, takokyī ibaa moto wa nga.

³⁸ Moto ootonyanya ekulusu ye pho ya im-benga, takokyī ibaa moto wa nga.

³⁹ Moto ookozingye ibanza bom̄o phe aabobungya, kasi ookobobungya pho ya nga amokula bozwa.»

*Moto oeyambi anzambi
(Malako 9.41)*

40 «Moto oeyambi, anzambi nga; ka moto oonzambi, ayambi yo owantoma.

41 Moto owamoyamba moimosi wa Nwaphongo pho ali moimosi, amozwa iphuti siiphe Nwaphongo moimosi. Ka moto owamoyamba moto owa ndondo elaa pho ali moto wa ndondo elaa, amozwa iphuti siiphe Nwaphongo moto wa ndondo elaa.

42 Nde phele na wo na bεε ngakye: Moto owa mopheε nɔnɔ kɔphɔ ya maa ma mpiyo na monomɔ wa baakyikyɔ onte ya baekosi banga, pho ali moekosi wa nga, amozwa iphuti se.»

11

Batima ba Yoane Mobatise (Luka 7.18-35)

1 Waaunva Yesu iphe baekosi bεε iko mbuka babale mibeko maamina, amba ya mana omɔ pho ya ikyemiimola na ikyemiteya o nkyisi yaa mambale.

2 Yoane Mobatise abaka o bɔlɔkɔ. Amba ya oka sango ya bitoma bikyele Klisto, emba amba ya toma baekosi bεε baayɔkɔ,

3 pho bakyetuna Yesu obokye: «Eli we Masiya osengyesi iya ndee toziya mosuu?»

4 Yesu amba babuyisa yokye: «Kyende kye imola Yoane maphɔɔ masɔ maokyi bεε na maaweni bεε.

5 Bato baaphɔɔ miyo babuto iwene, baa ɔtonɔ makolo babuto itambula, bato ba maba babikyɔ, baa loko babuto ioka, baawa baako, baa ngongo baokyi Simo Elaa.

⁶ Nkyisa ili na moto owa moba sa lee ianola se oka nga!»

Yesu kawo pho ya Yoane Mobatise

⁷ Waabutwa baekosi ba Yoane, Yesu aesi ya tata ituna bato pho ya Yoane yokye: «O bokye, okyeyki kyeka ye? Mumbunye monyingane na eweεε? Phe?

⁸ Ka okyeyki kyeka ye? Moto alati bitobu bilaa? Ka balate bitobu bilaa bazale o mangambi ma bakonzi.

⁹ Ka okyeyki kyeka nde iye? Moimosi wa Nwaphongo? εε, nde pheε na wo na bεε, alekyi na moimosi wa Nwaphongo.

¹⁰ Pho Yoane ali owa wo bεε o buku pha Nwaphongo bobo: “Namotoma tima ya nga o boo pha we pho ya iebongyisela nzela.”

¹¹ Nde pheε na wo na bεε ngakye: Onte ya bato baso baabotama na nwanwasi, oolekyi Yoane Mobatise na ngambo talii. Kasi oolekyi bokyiky o Bokonzi pha ikolo, yo mona alekyi Yoane na ngambo.

¹² Tata imbεε saaba Yoane kateya tee nono lolu eye, bali nde inwana na bokonzi pha ikolo; banguna balukye ibobololu.

¹³ Baimosi ba Nwaphongo baso, ebe na mibeko ma Mose, baimolaka maphoo mamana tee nono o imbεε sa Yoane.

¹⁴ Ka bokolukye imoanola, Yoane ali Eliya owa imolaka bεε iya se.

¹⁵ Ooli na matoo ma ioka, aokye!»

16 «Namoulinya bato ba loló na nza? Baulane na bana baakyiki baazasi o munsongo bambe wo na bebi na béé bekye:

17 “Toulesi iphengo, toikiy bina! Totubi meembo ma elesi, kasi toikiy lela!”

18 Pho Yoane aya, waaaba yo saza, sanywa, bekye: “Ali na bolobo bobo!”

19 Kasi Nwana wa Moto aesi, kaze, kanywe, bekye: “Kyeka moto oyo kaumunya nde izaa na inywa vinyo, ekamba ya baphutise bamputi na bato ba masumu!” Kasi zebi siwenene phele na bitoma ba sango.»

Nkyisi iinene ilé ianola Yesu

(Luka 10.13-15)

20 Emba Yesu amba butwa ioya nkyisi iinene yaakyelelaka yo bilekyesako biikye, pho bato ba nkyisi me tebaika bongola ntema ya be. Amba wo yokye:

21 «Ngongo ya we mokyisi nwa Korazine! Ngongo ya we mokyisi nwa Betesaida! Pho bilekyesako biakyelamaka oka béé bo biakyelamaka nde o Tula na Sidona, kalakala bato ba béé nde baunva lebe, nde baunva misweya mbutu, nde baunva bongola ntema ya be.

22 Yango mena nawo na béé ngakye: Mokolo nwaa mosambisa Nwaphongo bato, etumbu ya béé ya moleka eyaaka Tula na Sidona.

23 Na we Kapalanauma, koununya obokye wa mobaa nono o ikolo? Phe. Wamouta nono o mokyisi nwa bawe! Pho bo bilekyesako biakyelamaka oka ya we bo biakyelamaka o

Sodomo, mokyisi me nde motaaba na nono lolo eye.

²⁴ Yango mena nawo na we ngakye: Mokolo nwaa mosambisa Nwaphongo bato, etumbu ya we yamoleka eya Sodomo.»

*Yaka oka nga, wamoema
(Luka 10.21-22)*

²⁵ Imbele saasina Yesu amba ya wo yokye: «Ee Tata, Nkolo wa ikolo na munse, naephe melesi pho oziti maphoo mama na bato ba malondo na na bato baaekola, kasi omaimosi bato baatebali na ntina.

²⁶ Phele, Tata, wazingaka obokye wakyelame nde bomo.

²⁷ Tata aphe maphoo maso o maboko ma nga. Moto monomo taaebe Nwana bo teebe Tata, na moto monomo taaebe Tata bo teebe Nwana, na bawaa baazinga Nwana ibateya Tata.»

Phila na nga mokaka

²⁸ «Yaka oka nga bee baso baaphembi na iphila ephesi ezito na moeyeminya.

²⁹ Phila na nga mokaka, yaka ya zwe zebi oka nga, pho nali moto wa ngongo na wa bonyile; waamba ya zwa na boemakye.

³⁰ Mokaka moetomisa nga iphila nwa lawa, na ephesi ya nga teeli ezito.»

12

*Yesu ali Nkolo wa sabata
(Malako 2.23-28; Luka 6.1-5)*

¹ Imbele me, Yesu na baekosi bee babaka balekane o manzabi ma ble, yabaka mokolo

mōnōmō n̄wa sabata. Baekosi b̄eē b̄awaka na nzala; baesi ya butwa ikyeminokō bikpoto b̄a ble b̄ambe zaa ina mbuma. ² Waawene Bafalisayi b̄aafona, b̄amba ya wō na Yesu b̄ekye: «Kyeka baekosi b̄a wē b̄akyele ikyikatele mōbeko n̄wa b̄anga ikyela mokōlō n̄wa sabata!»

³ Yesu amba ya babuyisa yokye: «Toikatanga yaakyelaka Davidi na b̄ebi n̄e wawaka b̄eē na nzala?»

⁴ Anyōlōkō o Ingambi sa N̄waphongo yo na b̄ebi n̄e, b̄amba zaa mapa maaphēkye b̄eē N̄waphongo. Tebakokaka na imaza; phō mōbeko n̄wa b̄anga mowō obokye kyemaze nde b̄anganga b̄a N̄waphongo.

⁵ Naino totangyi o Mibeko ma Mose, wako-mama obokye b̄anganga b̄a N̄waphongo o Tempelo tebaakumole sabata, kasi nabō b̄afona tebali na lowō?

⁶ Nawō na b̄eē ngakye: Maphōō maawene b̄eē wawa malekyi Tempelo.

⁷ Bo oebakyi ntina ya maloba maakoma b̄eē o buku pha N̄waphongo maawō obokye: “Nazingye motema n̄wa iokyela b̄ato ngōngō, kasi mambeka ma manyama phe”, nde tobaoye.

⁸ Phō N̄wana wa Moto ali Nkolo wa sabata.»

*Yesu abikye moto owa nyiba ebokō
(Malako 3.1-6; Luka 6.6-11)*

⁹ Yesu amba ya mana o elele mē, aesi yakyende o ingambi sa makyita.

¹⁰ Moto mōnōmō owa nyiba ebokō abaka omō. Bafalisayi b̄alukaka nzela ya imophunda, yango mena b̄amba ya motuna b̄ekye: «Mōbeko

ηwa banga moanole ibikya moto mokolo ηwa sabata?»

¹¹ Yesu amba ya babuyisa yokye: «Bo monomo onte ya βεε ali na mpate yonoy; bo embikye kaa o ibela siizindo mokolo ηwa sabata, etaakye eyabola?»

¹² Moto alekyi mpate! Kyelukye iwō obokye, mobeko ηwa banga moanole ikyela moto bolaa mokolo ηwa sabata.»

¹³ Emba Yesu amba ya wō na moto owa nyiba eboko yokye: «Elola eboko ya we.» Amba ya eyelola nono waabutwa yango elaa ndokolo eeyoko.

¹⁴ Bafalisayi bamba ya tokolo o ingambi sa makyita, bamba ya kye angana pho ya iwangya ηwango ηwa iboma Yesu.

Yesu ali moto wa etoma owa olo Nwaphongo

¹⁵ Waaoka Yesu mapho maamana, aesi ya mana o elele me, bato baikye bamba ya mobenga. Amba bikya bato ba malosi baso.

¹⁶ Kasi amba ya bakatela na bokusi obokye βεε saimola bato elele eli yo.

¹⁷ Wakyelama babona pho ya ikokya maloba ma moimosi Isaya maa wō yo bobo:

¹⁸ «Ŋwaphongo yokye:

Kyeka moto wa etoma wa nga owa olo nga.

Na mozingye,

nali na nkyisa pho ye.

Bolobo pha nga pha moba ne,

pho aimole nkyisi iso mapho maazingye nga.

¹⁹ Eta okye booka na moto,

eta tombe ηwesi,

ete baamookye kakyemiwo o munsongo.

²⁰ Eta tene munkata nwaumbama;
eta zimya tala ekyelukye izima.

Amokyela baabona

tee nɔnɔ wa molonga maphoo maso na bosembo.

²¹ Amoɔa molemo nwa nkyisi iso.»

*Yesu katokolo malobo mabe
(Malako 3.22-30; Luka 11.14-23)*

²² Bamba yeleda Yesu moto monomo abaka na bolobo bofe, apholo miyo, ambi kula ba na mbubu. Yesu amba ya mobikya, emba moto me amba butwa iwo na iwene.

²³ Bato baso bakamwaka baamba tunana bekye: «Eye teli nkoko wa Davidi?»

²⁴ Waaoka Bafalisayi bawo baabona, bamba wo bekye: «Moto mona katokolo malobo mabe pho mokonzi nwa bee Belezebula amophe bokonzi me!»

²⁵ Kasi Yesu aebaka maumunya ma be, amba ya wo na bee yokye: «Bo bato ba bokonzi bonobo bakabwa onte ya be, bokonzi pha bee pha mowaa. Bo bato ba mokyisi monomo naa ba ibota sonoso bakabwa, mokyisi naa ibota me itesiikule ba.

²⁶ Ka bo Molemba awiinye moto we, kaoto nde bokonzi phe mampenza, emba bokonzi phe phaamba koko ndengye'ye?

²⁷ Bee kowo obokye Belezebula moto owampe mwiya nwa itokolo malobo mabe. Ka bo eli phele, owaamba phe bato ba bee mwiya nwa itokolo malobo mabe nza? Bato ba bee mampenza ba enyete!

28 Bo natokolo malobo mabe na Bolobo pha Nwaphongo, kyelukye iwɔ obokye Bokonzi pha Nwaphongo bokomi nono oka bɛɛ.»

29 «Moto takoyi inyolo o ingambi sa moto mokusi pho ya ibololo mbolo ye, bo naino tamokangyi maphanga; kasi bo amokangyi maphanga, akoyi imobololo mbolo iso ya ingambi.

30 Moto ootoli na nga mbale, kanzine. Yo ootonsungye na ibokya bato, ka banyangole.

31 Yango mena na wo na bɛɛ ngakye: Bato baso baakyele masumu na baatiyole Nwaphongo, baabalimbisa. Kasi moto owamowamba Bolobo Bosanto ete baamolimbisa.

32 Owa mowole Nwana wa Moto lowo lofe, baamolimbisa, ka nde yo owa mowole Bolobo Bosanto na bofe, ete baamolimbisa, ebe o mokyisi mumu, ebe na o mokyisi nwaa moyaa.»

*Nwete na mbuma ya nwango
(Matiye 7.16-17; Luka 6.44-45)*

33 «Bo ophikiyi nwete moola, wa mozwa mbuma iindaa; bo ophikiyi nwete mobe, wa mozwa nde mbuma iimbe. Pho baefe nwete nde na mbuma ya nwango.

34 Bɛɛ manzoo! Oli bato babe, waamba wo maphoo malaa ndengye'ye? Pho munoko katokolo nde maphoo maute o ndondo.

35 Moto molaa katokolo maphoo malaa maute o ndondo ye, moto mobe katokolo maphoo mabe maute o ndondo ye me.

36 Na wo na bɛɛ ngakye: Mokolo nwa mosambisa Nwaphongo bato, moto na moto amosamba

na maphoo maso maapha maatokolo o munoko nwe.

³⁷ Pho bamoelongya nde na bowokye pha we naa bamoenyete nde na bowokye pha we.»

Bafalisayi baongye elekyesako

(Matiye 16.1-4; Malako 8.11-12; Luka 11.16, 29-32)

³⁸ Emba bateye ba mibeko baayoko na Bafalisayi bamba ya wo na Yesu bekye: «Mot-eye, tozingye obokye olokyelele elekyesako.»

³⁹ Yesu amba ya babuyisa bobo: «Iwaphongo amoteya nde elekyesako yonyo eyaka moimosi Yona.

⁴⁰ Pho bo wakyelaka Yona nkolo iyato o ibuu sa swe eenene, nde bomo Nwana wa Moto amokyela nkolo iyato o se ya manyete.

⁴¹ Mokolo hwaa mosambisa Nwaphongo bato, bato ba Niniwe bamoya ephunda bee bato baa lolo, pho bee babongolaka ntema ya bee waoka bee yaawoko Yona. Kasi ooli wawa alekyi Yona.

⁴² Mokolo hwaa mosambisa Nwaphongo bato, mokonzi hwa hwanwasi wa mokyisi hwa Saba amoya ephunda pho yo autaka itakye pho ya iya oka maphoo ma zebi sa Salomo. Kasi ooli wawa, alekyi Salomo!»

Waakule ya butwa bolobo bobo

(Luka 11.24-26)

⁴³ «Bo bolobo bobo botokosi onte ya moto, bokye miengyebana o bokye pho ya iluka elele ya ifaa. Bo te bozwe elele,

⁴⁴ bomiwole obokye: “Nakule butolela moto owa baka nga pho yo ali ndokolo ingambi sa

nga.” Kasi waa ya butwa phaango, boyazwa ingambi me pha, basi bongye na bolaa.

⁴⁵ Emba boombe kye kpa mbengo ya malobo masuu sambo maabolekye na bobe; mango maso maambe yaa molongo iya zala o nzoto ya moto mona. Emba moto mona kambe otono ileka bowabaka yo phanza. Ya moba nde bomo pho ya bée bato baabe baalolo.»

*Saakolo ibota sa Yesu
(Malako 3.31-35; Luka 8.19-21)*

⁴⁶ Waaba Yesu kataa wo na bato, nyango na bana nyango baamba ya. Baesi ya teme o nze, balukaka iwono ne.

⁴⁷ Moto monomo amba ya wo na Yesu yokye: «Kyeke, nyongo na banaa nyongo bali o nze, balukye iwono na we.»

⁴⁸ Yesu amba ya buyisa moto me yokye: «Mama nza? Banaa mama banza?»

⁴⁹ Amba teya na eboko bili baekosi bée yokye: «Kyeke mama na banaa mama bée baba.

⁵⁰ Pho moto okokyele mapho maazingye Tata owa ikolo ali nwana mama, nkanasa ya nga na mama.»

13

*Ete ya mophikiyi
(Malako 4.1-9; Luka 8.4-8)*

¹ Mokolo mamuna, Yesu amba ya tokolo o ingambi, aesi ya kye zala o mokukulu nwa ebale pho ya iteya.

² Bato baikye bamba ya angana wali yo, yango mena Yesu amba ya baa o vato, akye zala. Bato baso batemekye o mokukulu.

³ Yesu amba ya baimola maphoo maikye na bite. Awoko yokye: «Moto monomo akyekye phika ndemo o inzambi se.

⁴ Wa ba yo kakyeminyaka ndemo, ndemo iiyoko ikaa o nzela, manyosi maesi ya ikomola.

⁵ Ndemo iiyoko ikye kaa o elele ya mabanga, wamo manyete maikye phe, yango mena ndemo itokosi sakoko.

⁶ Waangala moo, inyiti pho nkanga te ya ikaka nyosa.

⁷ Ndemo iiyoko ikye kaa o nkata yaa milo, nkata me ikosi, ikyetitise ndemo iindaa.

⁸ Kasi ndemo iiyoko ikaa o manyete malaa, ifoti, ina mbuma munkama, iiyoko mbuma makoo motoba, iiyoko mbuma makoo maato.»

⁹ Yesu amba kula bakya yokye: «Ooli na matoo ma ioka, aokye!»

*Pho ya'ye Yesu kawo na bite
(Malako 4.10-12; Luka 8.9-10)*

¹⁰ Emba baekosi bamba ya susinya phenephe na Yesu, bamba ya motuna bekye: «Pho ya'ye kolowole na bite?»

¹¹ Yesu amba ya babuyisa yokye: «Be okokyi eba sekyele ya Bokonzi pha Ikolo, kasi bee tebakokyi ieyeba.

¹² Pho moto ooli na mbolo nzikye, bamokula mobakysisela, kasi ooli phaa, baamobololo na njwana ndambo oobakyi ne.

¹³ Yango mena nakpe bite pho ya ibawole, pho na bo bakyekye tebawene, na bo balaa mato, tebaokye, tebaa sosolo, tebaambe na eba.

¹⁴ Na babona maloba ma moimosi Isaya makokyisame waa wo yo obokye:

“Na bo ookyi ndengye'ye, otoeβe,
na bo olembetesi ndenye'ye, otoowene.

¹⁵ Pho βato βaba βali na ntema nkusi,
βamiundi matoo, βazibi miyo pho βée sawene,
βée saoka, βée saeβa.

Bo sa βabona phe, nde βabongolaka ntema
ya βée pho nababikya, kye wo
Nwaphongo.”»

¹⁶ «Ka βée, βa na nkyisa pho miyo ma βée
mawene, matoo ma βée maokye!

¹⁷ Nde phele na wo na βée ngakye: Baimosi
βaikye na βato βa βosembo βaikye βabaka na
phowa ya ioka na ya iwene maphoo mawene βée
mama, kasi teβaika mawene, βabaka na phowa
ya ioka maphoo maokye βée mama, kasi teβaika
maoka.»

*Yesu alimbosi ete ya mophikiyi
(Malako 4.13-20; Luka 8.11-15)*

¹⁸ «Okyemela ntina ya ete ya mophikiyi.

¹⁹ Bato βaakye simo ya Bokonzi pha ikolo
kasi teβaikyi esoo, βali ndokolo ndemo ikaa
o nzela, Munguna aesi ya imanya o mandondo
ma βe.

²⁰ Bato βaayoko βali ndokolo ndemo ikaa o
manyete maangana na maβanga, βaokye iloba
sa Nwaphongo, βasianole na nkyisa izele.

²¹ Kasi iloba me tesii tokolo nkanga o man-
dondo ma βe, βasikyelele nde ηwana βokyi
βobo; emba wambe yaa mampasi na minyoko
pho ya iloba sa Nwaphongo, βale ianola sa βée
izele.

²² Bato βaayoko βali ndokolo ndemo ikaa onte
ya nkata yaa milo, βaokye iloba sa Nwaphongo,

kasi pho ya phowa ya mokyisi na phowa ya ezwele ekye kosa bato, iloba me sioṭoṭo, emba tesii bote na ekpele.

²³ Bato bayoko bali ndokolo ndemo iikaa o manyete maalaa, baokye iloba sa Nwaphongo, basisoṣolo, emba baambe bota mbuma: Bana munkama, baayoko makoo motoba, baayoko makoo maato.»

Ete ya munkata moobe

²⁴ Yesu amba kula ya bakpela ete esuu yokye: «Bokonzi pha ikolo pha ulana na moto monomo owa aphikaka mumboto molaa o inzabi se.

²⁵ Mokolo monomo, waa mokolo, waaba bato baso na ebuu, munguna nwa moto mono aesi ya kyende phika munkata moobe o nte ya ble nono wakyende yo.

²⁶ Waatokolo nkona, ble ekyesi ndomba, munkata moobe motokosi na nwango me.

²⁷ Baombo baesi yakye wo na mokolo inzambi bekye: “Nkolo, ka waphikaka mumboto moola o inzabi sa we, ka munkata moobe mouti bi?”

²⁸ Amba ya babuyisa yokye: “Eli munguna nwa nga moto okyesi baabona.” Emba baombo baamba ya motuna bekye: “Ozingyi obokye tokye manya munkata moobe?”

²⁹ Amba babuyisa yokye: “Phe, pho waamunya be munkata moobe nde obisi na ble.

³⁰ Oile kyikole yango iso, waainoko, imbele me, na mowo na banokyi ngakye: Taabila munkata moobe phanza, omokangye mbombo mbombo pho ya imotumba, sima ombe angyisa ble oenyosa o bompente pha nga.”»

*Ete ya mumbuma n̄wa mutarde
(Malako 4.30-32; Luka 13.18-19)*

³¹ Yesu ambakula bakpela ete esuu yokye: «Bokonzi pha ikolo pha ulana na mumbuma n̄wa mutarde n̄waaphika moto monom̄o o inzabi s̄e.

³² Eli mumbuma moolekyi bokyikyī onte ya mbuma iso, kasi bo motokosi, molekye ndemo iso iili onte ya inzabi na phanda. Mobutwe n̄wete na bitakyi, manyosi maya tonga moobo om̄o.»

*Ete ya mun̄o moulole mapa
(Luka 13.20-21)*

³³ Yesu amba kula ya bakpela ete esuu yokye: «Bokonzi pha ikolo pha ulana na mun̄o n̄wa mapa moangyinya n̄wan̄wasi na faline iikye, n̄on̄o waanyangwe n̄wango oena faline es̄o.»

*Ph̄o ya'ye Yesu abaka kaw̄o na bite
(Malako 4.33-34)*

³⁴ Yesu awole bato maph̄o mas̄o maamana na bite, abaka kabawole nde na bite.

³⁵ Akyelaka babona ph̄o ya ikokya maph̄o maawoko moimosi obokye: «Na mow̄o nde na bite. Namolimola maph̄o maabombama uta o etatele ya mokyisi.»

Yesu alimbosi ete ya munkata moobe

³⁶ Emba Yesu amba ya mana wali bato, amba ya butwa o ingambi. Baekosi b̄eε bamba yakye wali yo, bamba ya motuna bek̄ye: «Ololimbolele ete ya munkata moobe o inzambi.»

³⁷ Yesu amba ya babuyisa bobo: «Moto ookophikye mumboto moola, eli Nwana wa Moto,

³⁸ inzambi eli mokyisi, mumboto moola eli baanole Bokonzi pha ikolo, munkata moobe eli bato baanole Munguna.

³⁹ Munguna okophikye munkata moobe, eli zabulu, mbuma ya inoko eli suka ya mokyisi, banokyi eli banze.

⁴⁰ Bookomanya bée munkata moobe pho ya imovaka o nwenya, yamoba nde bomo o suka ya mokyisi.

⁴¹ Nwana wa Moto amotoma banze be, bamumanya o bokonzi phe bato baso baso ianola sa bebi, na bato baakyele bobo,

⁴² baabavaka o itumbu sa nwenya, omo nde malelo na itwa mino.

⁴³ Kasi bato baa bosembo bamungyengye ndokolo moo o bokonzi pha Ango wa be. Oli na matoo ma ioka, aokye!»

Ete ya ezwele eya bombama

⁴⁴ «Bokonzi pha ikolo pha ulana na ezwele eya kundama o inzabi. Moto monomo akye ekundola ambikula ebomba. Na nkyisa iso, akye ungya mbolo ye iso pho aombe sina inzabi.»

Ete ya bayaka

⁴⁵ «Bokonzi pha ikolo pha ulana na muungye wa mbolo ookolukye bayaka baala.

⁴⁶ Bo azwe yonyo eya motuya mwikye, amokye ungya mbolo iso ili ne pho akye omba bayaka me.»

Ete ya bondendi

⁴⁷ «Bokonzi pha ikolo pha kula ulana na bondendi bovakyi bée o ebale, booakye swe ndengye na ndengye.

⁴⁸ Botondi na swe, baosi babobendi o mokukulu, emba bambe zala pho ya iolo swe, iindaa baikyele o bikokolo, iimbe baivakye.

⁴⁹ Ya moba nde bomo o suka ya mokyisi, banze bamoya kabola bato baabe na bato baala.

⁵⁰ Pho ya ivaka bato baabe o itumbu sa ηwenya, omoo nyaa malelo na itwa mino.»

Bizwele biikasi na biinyakune

⁵¹ Yesu amba ya batuna yokye: «Bee ookyi maphoo maso mama na bolaa?» Bamba ya mobuyisa bekye: «Ee, tookyi.»

⁵² Emba amba ya wo na bée yokye: «Yango mena, moteye wa mibeko munso ookoekole maphoo ma Bokonzi pha ikolo kaulane na moto wa ezwele ookotokolo ná mbolo iinkasi ná mbolo iinyakune.»

Bato ba Nazarete bale ianola Yesu (Malako 6.1-6; Luka 4.16-30)

⁵³ Waaunva Yesu ikpa bite babina, amba ya mana omoo,

⁵⁴ amba ya kyende o mokyisi ηwaakolaka yo. Aesi ya butwa iteya o Ingambi sa makyita. Emba bato baso baabaka wamo bakamwaka na boikye. Bawoko bekye: «Azwe zebi sisi bi? Kakyele bilekyesako bibi ndengye'ye?

⁵⁵ Teli yo ηwana wa mowasi ηwa mabaya? Nyango teli Maliya? Banaa nyango teli Zake, Zozefu, Simo na Yuda?

⁵⁶ Mankanasa me maso temali na banga wawa? Bona bokonzi bobo abozwe bii?»

⁵⁷ Yango mena tebaikaka moanolela. Emba Yesu amba ya wo na bee yokye: «Moimosi wa Nwaphongo kazwe ngambo o nkyisi iso manya nde o mokyisi nwe na o ibota se.»

⁵⁸ Yesu amba ya kyela omu nde banaa bilekye-sako ndambo pho bee tebaikaka moanola.

14

Iwaa sa Yoane Mobatise

¹ Imbele saasina, Elode, mokonzi nwa Galileya, aesi ya oka bawo pho ya Yesu.

² Amba ya wo na bato baetoma bee yokye: «Eli Yoane Mobatise, akundo! Yango mena azwe mwiya nwa ikyela bilikyesako bobo.»

³ Pho phanza, Elode atomaka baakya Yoane, bamokangye maphanga, bamovakye o boloko. Yabaka pho ya lowoo la Elodiya, nwasi wa nwana nyango Filipe.

⁴ Pho Yoane awoko na Elode yokye: «Mibeko ma banga mikatele obokye tokokyi ibuya Elodiya nwasi wa we!»

⁵ Yango mena Elode alukaka iboma Yoane, kasi abaka kalote Bayuda, pho bato baso bakpaka Yoane ndokolo moimosi.

⁶ Nzuka mokolo nwaakyelaka Elode eseleko ya iyumunya mokolo nwaabotamaka yo, nwana wa Elodiya wa nwanwasi amba ya bina o boo pha bato baabangaka yo. Asepelisaka Elode na boikye.

⁷ Yango mena Elode amba kata seleka obokye aamophe ekpele eso eya moonga yo.

⁸ Uta na mateya ma nyango, ηwana amba ya wɔ na Elode yokye: «Impε unwanwa'eye moto ηwa Yoane Mobatise mi lako!»

⁹ Mokonzi Elode aesi ya oka ngongɔ boikye, kasi phɔ ya seleka eyakataka yo o boo pha bato baabangaka yo, amba ya toma obokye bamophe moto ηwa Yoane.

¹⁰ Amba ya toma moto monomɔ ikye tena moto ηwa Yoane o bolokɔ.

¹¹ Baamba yaa na moto me mi lako, bamba ya mophe ηwana wa ηwanwasi me, yo amba yakye mophe nyango.

¹² Baekosi ba Yoane bamba yakye kpa ena ebembe bamba kye ekunda. Bamba kye imola Yesu maphɔɔ maaleka.

Yesu azeye bampele nkoto itano

¹³ Waaoka Yesu simo ya iwaa sa Yoane Mobatise, aesi ya mana omɔ yaa vato, amba ya kye yo mampenza o elele yonɔyɔ ya indende. Kasi bato baesi ya eba, bamba tokolo o nkyisi ya phenephe, bamba ya mobenga na makolo yaa mokukulu.

¹⁴ Waabwa yo o vato, aesi ya wene bato baikye, amba baoka ngongɔ, amba butwa ibikya bato ba bee baamalosi.

¹⁵ Waakoma waa nkɔkɔlɔ, baekosi ba Yesu bamba ya susinya oli yo, bamba ya wɔ ne bee kye: «Bunya bokye, elele eye eli indende, buya bato phɔ bakye o nkyisi bakye omba ntoma ya iza omɔ.»

16 Yesu amba ya babuyisa yokye: «Te wali ntina obokye bakwendε, obaphe bεε mampenza ntoma ya iza!»

17 Kasi bεε bamba ya wɔ ne bεkye: «Wawa, toli nde na mapa matano na swe ibale.»

18 Yesu amba ya wɔ na bεε yokye: «Inzelele na yango.»

19 Emba, amba ya wɔ na bato basɔ bazale o nkata, aesi yakpa mapa matano na swe ibale miina, amba ya tomba miyo o ikolo, aphe Nwaphongo melesi. Aesi ya kyese mapa amaphe baekosi. Emba baekosi bamba kyemikabela bato.

20 Bato basɔ bazaka, baokaka. Baekosi bamba ya ongo banyanzima iko mbuka babale bobεε ba bitee baikalaka.

21 Bato baazaka babaka bampele phenephe na nkoto itano sa tanga babasi na bana.

Yesu atambusi o ikolo sa maa

22 Sakɔkɔ Yesu aesi ya toma baekosi bεε ba baa o vato phɔ bakatisa o boo phe o mokukulu moyɔkɔ, wamɔba yo kataa buya bato.

23 Waunva yo ibabuya, aesi ya baa o bokosi phɔ ya ibɔndεε. Waakoma nkɔkɔlɔ aikalaka wamɔ nde yo mampenza.

24 Vato pha komaka o bɔdiko, kanda yabaka kye babuya na munsima phɔ ewεεε yabaka ekusi.

25 Wakoma bunya phenephe na iye, Yesu amba ya benga baekosi bεε yaa makolo, amba tambula o ikolo sa maa.

26 Waamowεne bεε katambule o ikolo sa maa, bawenεkye bɔɔbɔ, bamba wɔ bεkye: «Eli

mozisi!» Bamba butwa iyanwana na bona bɔɔbɔ.

²⁷ Kasi mbala yɔnɔyɔ Yesu amba ya wɔ na bɛɛ yokye: «Saila, eli nde nga, bɛɛ salota!»

²⁸ Emba Petelo amba ya wɔ na Yesu yokye: «Bo eli wɛ phɛɛ, wɔ nanga na tambule o ikolo sa maa, nayee oli wɛ.»

²⁹ Yesu amba ya mobuyisa yokye: «Yaka!» Petelo aesi ya tɔkɔɔ o vato amba ya butwa itambula o ikolo sa maa, phɔ ya ikyendɛ oli Yesu.

³⁰ Kasi waawɛnɛ yo ewɛɛɛ ekusi, amba ya wɛnɛ inganga. Amba ya tata izinda nɔnɔ wa anwana yo yokye: «Nkolo, imbikya!»

³¹ Mbala yɔnɔyɔ, Yesu amba ya elola ebɔkɔ, aesi ya mophila, amba ya wɔ nɛ yokye: «Moto wa ianola sikiyiki! Phɔ ya'ye oikakya ziko?»

³² Emba bɛɛ basɔ babale bamba ya baa o vato, ewɛɛɛ esi ya lɛɛ.

³³ Bobɛɛ baekosi babaka o vato bamba ya kusama na mabɔngɔ o boo pha Yesu, bamba ya wɔ bɛkye: «Oli Nwana wa Nwaphongo phɛɛ!»

Yesu abikye bato ba malɔsi o Genesalɛtɛ

³⁴ Waaunva bɛɛ ikatisa ebale, baesi ya kye semɛ o manyɛtɛ ma Genesalɛtɛ.

³⁵ Bato ba mokyisi mɛ baɛbaka Yesu phanza, emba waamowɛnɛ bɛ, bamba kyemiimola mboka esɔ obokye aesi. Bamba moyelela bato basɔ baa malɔsi.

³⁶ Bamba ya nyingonela nɛ obokye abalɛ bakume nɔnɔ songya ya munkoto nwe. Bato basɔ baamokumaka babikaka.

15

Yesu kateya pho ya mateya ma bankoko

¹ Mokolo monomō, Bafalisayi na Bateye ba mibeko bautaka o Yelusaleme, bamba ya angana oli Yesu, bamba ya motuna bekye:

² «Pho ya'ye, baekosi ba we tebaakumole mibeko ma bankoko? Pho tebaakunyole se o boo pha iza.»

³ Yesu amba ya babuyisa yokye: «Ka be, pho ya'ye tookumole mibeko ma Nwaphongo, Kokumole nde bonkoko pha be?»

⁴ Pho Nwaphongo awo boho: “Kumola nyongo na ongo”, kasi “owa motola nyango na ango, basengyesi imoboma.”

⁵ Kasi be kowo obokye: “Moto akokyi iwō na nyango ebe na ango obokye mbolo iunvakiy esunga na nga, na ibombi pho ya Nwaphongo.”

⁶ Bo awo babona, takokyi kula sunga na nyango na ango. Mena kabuya mibeko ma Nwaphongo ekpele phaa pho ya itosa bonkoko pha be mampenza.

⁷ Banyamabole! Moimosi Isaya abaka nde na elongyi waawo yo pho ya be boho:

⁸ “Bato baba bankumole nde na munoko. Kasi o mandondo bali itakye na nga.

⁹ Losambo la be teloli na ntina. Pho mateya ma be mali nde mibeko miute na bato.”»

Mapho maato ndondo ya moto

¹⁰ Bobele, Yesu amba ya banga bato baso, amba ya wo na be yokye: «Okyemela, ombe na kytolela:

11 Teli ekpele ekye nyɔlɔ o munɔkɔ ŋwa moto ekye mobuya moto wa sɔkɔtɔ. Kasi ekyetɔkɔlɔ o munɔkɔ nwe, kyeka yango ekye mobuya moto wa sɔkɔtɔ.»

12 Emba baekosi bamba susana phɛnɛphɛ na Yesu, bamba ya wɔ nɛ bɛkye: «Koebe obokye maphɔɔ maawɔ we mamana, maphe Bafalisayi ndondo bolɔsi?»

13 Yesu amba ya buya yokye: «Ŋwete munso ŋwaatenwaika phika Tata oli o ikolo, baamophikola.

14 Obale! Bali bato baaphɔlɔ miyo bateya bato baaphɔlɔ miyo nzela. Bo moto mɔnɔmɔ owa phɔlɔ miyo kateya nwebi nɛ owa phɔlɔ miyo nzela, bɛɛ baso babale bamokaa o ifela.»

15 Petelo amba ya wɔ na Yesu yokye: «Ololimbolele ntina ya ete mɛ.»

16 Yesu amba ya wɔ yokye: «Na bɛɛ naino tozwe malondo?»

17 Bɛɛ toebe obokye ekpele eso ekye nyɔlɔ o munɔkɔ ŋwa moto, kyelekane o ibuu sɛ, emba sima kyekye tɔkɔlɔ o zikyɪ?

18 Kasi ikyi tɔkɔlɔ o munɔkɔ, kyiute o ndondo, yango ikokyi ibuya moto, moto wa sɔkɔtɔ.

19 Phɔ maumunya masɔ ma ikyela bofe maute o ndondo ya moto, eli booli iboma bato, ikyela baphemba, ikyela bondumba, iiba, ikatela bato bolɛ, na iyɔ bato.

20 Mena eli maphɔɔ maɔtɔ moto. Kasi iza sa-taa kunyola sɛ, tesiibuya moto, moto wa sɔkɔtɔ.»

Nwanwasi ootoli Moyuda aanosi Yesu

21 Bobele Yesu aesi ya mana o elele mɛ, akye o nkyisi ya Tula na Sidona.

²² Nwanwasi monomɔ wa Kanana abaka kazale o mokyisi mɛ, amba yaa oli Yesu, amba ya anwana yokye: «Moteye, Nwana wa Davidi, inzokye ngɔngɔ! Nwana wa nga wa nwanwasi ali na bolɔɔ boɔe, bomunyɔkɔlɔ na bokusi!»

²³ Kasi Yesu taika mobuyisa na lowɔɔ. Baekosi bamba yaa oli Yesu. Bamba ya wɔ nɛ bɛkye: «Omowiinya, phɔ taale ikyemianwana o sima ya banga.»

²⁴ Yesu amba ya buya yokye: «Bantoma nde oka bato ba Isalayɛɛ baali ndokolo mampate maabunga.»

²⁵ Kasi nwanwasi mɛ, amba ya kusama o boo pha Yesu, amba ya wɔ yokye: «Moteye, insungye!»

²⁶ Yesu amba ya wɔ yokye: «Teli bolaa o bokye okpe ntoma ya bana oivakyele manva.»

²⁷ Nwanwasi mɛ amba ya wɔ yokye: «Nde phɛɛ Moteye, kasi manva mazee mpusu ikylale o se ya mesa ma bankolo ba mɛ.»

²⁸ Emba Yesu amba ya mobuyisa yokye: «Ee, nwanwasi oyo! Oli na ianola sinɛnɛ. Waekye-lamele boozingyi wɛ.» Nde o sina imbele mɛ, nwana wɛ abikiyi.

Yesu abikye bato baikye baa malɔsi

²⁹ Bobɛɛ Yesu aesi ya mana wa mɔ, akye o mokukulu nwa maa maanɛnɛ ma Galileya. Aesi ya kye zala o ikolo sa ngomba.

³⁰ Bato baikye bamba ya kyɛndɛ oli yo. Banyanye bato baatɔnɔ makolo, bato baaphɔlɔ miyo, bituku, mambubu, na bato baa malɔsi

ndengye na ndengye. Bamba ya bazasa o se o boo pha Yesu, emba amba ya babikya.

³¹ Bato bakamwaka waaawenee bee mam-bubu mabuto iwo, bituku bibikiyi, bato baa ototo makolo batambusi, bato baapholo miyo, baweni. Emba bato baso bamba tata ikumbela Nwaphongo owa Isalaye.

Yesu azeye bampele nkoto ine

³² Yesu amba ya banga baekosi be, amba ya wo na bee yokye: «Naokyele bato baba ngongo, pho nkolo iyato bali na nga wawa, kasi tebali na ntoma ya iza. Sizingye ibabuya na nzala, pho imbele sisuu nde bakye kpa phikiyi o nzela.»

³³ Baekosi bamba ya motuna bekye: «Wawa toli o bokye, tomokye zwa ntoma bi, obokye bazee baokye?»

³⁴ Emba Yesu amba ya batuna yokye: «Bee, oli na mapa bo?» Bamba mobuyisa bekye: «Toli na mapa sambo na banaa swe inkyiki.»

³⁵ Emba Yesu amba ya wo na bato baso obokye bazale o se.

³⁶ Aesi ya kpa mapa sambo na ina swe, aphee Nwaphongo melesi, aikyesi, aiphe baekosi bee obokye baikabe. Baekosi baikpe, baikabesi bato baso.

³⁷ Bato baso baazaka baokaka. Baekosi baongoko ntoma yaa otwaka be, ya tonzaka banyanzima sambo.

³⁸ Bato baazaka babaka bampele nkoto ine, sa tanga babasi na bana.

³⁹ Waaunva yo ibuya bato o nkyisi ya be, Yesu aesi ya baa o vato, aesi ya kyende o manyete ma Magadana.

16

Bafalisayi na Basadukayi baongye elekyesako

¹ Bafalisayi na Basadukayi bamba ya waali Yesu pho ya imumeka. Baesi ya motuna obokye akyele elekyesako pho ya iteya obokye maphoo maakyele yo maute oka Nwaphongo.

² Yesu amba ya babuyisa bobo: «Waakome nkokolo b̄e kowo obokye: “Mbula eteenɔ, pho ikolo sili silaa.”

³ Ka waamunkunkutu b̄e kowo obokye: “Lolo mbula ya muno, pho ikolo sibelo.” Waakyekye b̄e ikolo, b̄e koebe naa mbula ya muno naa eteenɔ. Kasi bileko biiteya maphoo ma nkolo ikyiye, toebe ibilimbola.

⁴ Banyamaɓɓe, bato ba lolo eye bali bato babe na bato ba bikobo, tebaakumole Nwaphongo, baongye elekyesako. Kasi etebawene na elekyesako na yɔɔyɔ, bo teebe nd'eyaaka Yona phe.» Emba, amba ika baika, aesi ya kyende.

Kyeba na mateya na Bafalisayi na Basadukayi

⁵ Waakatisaka baekosi o mbale eeyoko ya maa ma manene, babungaka iphila mapa.

⁶ Emba Yesu amba ya wo na b̄e yokye: «Kyeka! Nde kokyebe na munoɔ hwa Bafalisayi na Basadukayi moulole mapa!»

⁷ Baekosi bamba butwa iwono b̄e na be, bekye: «Awo babona pho tololi na mapa.»

⁸ Kasi Yesu aebaka maumunya ma be, amba ya batuna yokye: «Pho ya'ye kowono b̄e na b̄e

obokye, nde pho tololi na mapa? Bato ba ianola sikyikyiyi.

⁹ Bèè naino tosoosi? Umunya mapa matano maazeyaka nga bampele nkoto itano. Umunya na motuya nwa banyanzima baa ongoko be?

¹⁰ Umunya na mapa sambo maazeyaka nga bampele nkoto ine, banyanzima bo baa ongoko bèè?

¹¹ Pho ya'ye bèè tosoolo obokye siikaka wo na bèè pho ya mapa, waawoko nga na bèè obokye: “Kyeba na muno nwa Bafalisayi na Basadukayi moulole mapa!”»

¹² Emba baekosi bamba ya soolo obokye Yesu taikaka wo na bèè obokye bakyebe na muno moulole mapa, kasi bakyebe na mateya ma Bafalifayi na Basadukayi.

Petelo awoo yokye Yesu ali Masiya

¹³ Yesu amba ya kyende o nkyisi iili phenephe na manyete ma Sezare, mokyisi nwa mokonzi Filipe. Amba ya tuna baekosi bèè yokye: «Bato bawo bo pho ya Nwana wa Moto?»

¹⁴ Bamba ya mobuyisa bekye: «Bakyi bawo obokye oli Yoane Mobatise, bana bekye oli Eliya. Baayoko bakule wo bekye oli Jeremi naa monomo na baimosi.»

¹⁵ Amba ya batuna yokye: «Ka bèè, kowo obokye nga nali nza?»

¹⁶ Simo Petelo amba ya buya yokye: «Iwe oli Masiya, Nwana wa Nwaphongo wa bomoo.»

¹⁷ Emba Yesu amba ya wo ne yokye: «Oli na nkyisa boikye, Simo nwana wa Yoane pho teeli

moto oeteye maphoo mama, kasi nde Tata ooli o ikolo.

¹⁸ Emba nga na wo na we ngakye: Oli Petelo, o ikolo sa ibanga sisi namotonga ingomba sa nga, na iwaa etesiikokye isibukola.*

¹⁹ Namoephe maphungola ma Bokonzi pha ikolo, eya mokanga we wawa o se, Nwaphongo amoekanga o ikoli me, eya moingola we wawa o se, Nwaphongo ne amoeyingola o ikolo.»

²⁰ Emba Yesu amba ya katela baekosi bee na bokusi obokye bee saimola nono moto obokye iyo ali Masiya.

Yesu aimosi bo wamowaa yo na bo wamokundwa yo

²¹ Tata imbele me, Yesu atati iimola baekosi bee polele maphoo maalukye imoyelela, amba ya wo yokye: «Esengyesi obokye na kyende o Yelusaleme, omu, bankumu, bakonzi ba banganga ba Nwaphongo, ebe na bateye ba mibeko bomunveninya bolosi boikye. Bamumboma, kasi sima ya nkolo iyato na mokundwa.»

²² Emba Petelo amba kye ne nwana imbale, amba butwa imooya yokye: «Ee Nkolo! Nwaphongo amoebanza, maphoo mamana ete maakyelame!»

²³ Yesu aesi yaekpana, amba ya wo na Petelo yokye: «Mana itakye na nga, Satana! Oli ibaku pho ya nga! Pho toumunya bokoumunya

* **16:18 16.18** O munoko nwa Baela, nkombo ya petelo kyelukye iwo obokye ibanga.

Nwaphongo, kasi kounyanya bokounyanya bato.»

²⁴ Emba Yesu amba ya wo na baekosi bee yokye: «Bo moto kalukye imbenga yo sakula luka bolaa phe mampenza, anyanya ekulusu ye, emba ambe mbenga.

²⁵ Pho moto ookolukye ibikya bomoo phe, aabobungya, kasi owa mobungya bomoo phe pho ya nga, aabozwa.

²⁶ Na bo moto azwe ezwele eso eli o mokyisi, kasi abungye bomoo phe, ambi zwa ekpele'ye? Ekpele'ye eekokyi yo iambya pho ya iikola bomoo phe?

²⁷ Pho Nwana wa Moto amoya o nkyemo ya Ango, yo na banze bee, emba amba phuta moto na moto ikokana na bitoma be.

²⁸ Nde phele na wo na bee ngakye: Onte ya bee baso baali wawa, bana ete baata waa phanza, saika wene na miyo bo wa moyaa Nwana wa Moto ndokolo mokonzi.»

17

Yesu awene o nkyemo ya Nwaphongo

¹ Sima ya nkolo motoba, Yesu aesi ya kpa Petelo, Zake na Yoane, nwana nyango na Zake, akye na bee o ngomba yonyo eanda, itakye na bato, omo babaka nde bee mampenza.

² Nzoto ya Yesu ya butwaka ndengye esuu o miyo ma be. Boo phe pha butwaka bongyengye ndokolo moo, bitobu bee ba butwaka bitane pee.

³ Bobele, baekosi me baato baesi ya wene Mose na Eliya bawono na Yesu.

⁴ Emba Petelo amba ya wɔ na Yesu yokye: «Nkolo, eli bolaa obokye tobee wawa. Boozingyi, namotonga ndalaku iyato wawa, mɔnɔmɔ phɔ ya wɛ, muna phɔ ya Mose, mooyɔkɔ phɔ ya Eliya.»

⁵ Waataba yo kawɔ, impata sɔnɔsɔ siitane siesi ya baziba, onte ya impata mɛ, ηwesi mɔnɔmɔ moesi yaokana, mowɔ bofo: «Oyo ali Nwana wa nga owa sɔmi, nali na nkyisa boikye phɔ yɛ. Omookye!»

⁶ Waaoka baekosi ηwesi mɛ, bawenɛkye bofo boikye, nɔnɔ waauya bɛɛ maboo nɔnɔ o se.

⁷ Yesu amba ya kyende ooli bɛ, aesi ya bakuma, amba ya wɔ na bɛɛ yokye: «Inwaa, bɛɛ saila!»

⁸ Bamba inola maboo, kasi tebaikiyi wene moto mosuu, nde Yesu yo mampenza.

⁹ Waaba bɛɛ baute ngomba, Yesu abakatelaka yokye: «Bɛɛ saimola nɔnɔ moto mɔnɔmɔ maphɔɔ masɔ maaweni bɛɛ, tee nɔnɔ mokɔlɔ ηwaamokundwa Nwana wa Moto onte ya bawee.»

¹⁰ Bobele baekosi bamba ya tuna Yesu bɛkye: «Phɔ ya ye bateye ba Mibeko bawɔ obokye, esengyesi obokye Eliya aye phanza?»

¹¹ Iyo, amba ya babuyisa yokye: «Eli bomɔ, esengyesi obokye Eliya aye phanza phɔ ya iyabongya maphɔɔ masɔ.»

¹² Kasi nga na wɔ na bɛɛ ngakye: Eliya nga aunva yaa, kasi tebaika moeba. Bamokyelela maphɔɔ masɔ mabe bo wazingaka ntema ya bɛ. Yango mena, bamunyɔkɔlɔ Nwana wa Moto nde bomɔ.»

¹³ Emba, baekosi basasoloko obokye kaba wole pho ya Yoane Mobatise.

Yesu abikye ηwana ooli na bolobo bofe

¹⁴ Waabutwa bée o elele eyikalaka bato, moto monomō amba yaa ooli Yesu, amba kusama na maḅongō o boo phe.

¹⁵ Amba ya wō ne yokye: «Moteye, okyela ηwana wa nga wa lele ngongō. Ali na iphukuluku, mbala esuu kakaa naa o ηwenya naa o maa.

¹⁶ Nayakakyi ne oka baekosi ba we, kasi tebaikyi koka imobikya.»

¹⁷ Yesu amba ya wō na bée yokye: «Oo! Bèe toli nde na ianola! Esengyesi obokye na kule ba na bèe bileko bo? Inzelele na ηwana me wawa!»

¹⁸ Yesu amba phaphala na bolobo bofe me, emba phamba tokolo o nzoto ya ηwana, mina wamō, ηwana abikyi.

¹⁹ Baekosi bamba yaa bée na bée oli Yesu, bamba ya motuna bekye: «Banga toloikyi koka itokolo bolobo bofe me pho ya'ye?»

²⁰ Yesu amba ya babuyisa yokye: «Pho bèe oli na ianola sikyikyi. Nde phele na wō na bèe ngakye: Nabo oli na ianola sikyikyi booli mum-buma ηwa mutarde, wamowō na ngomba eye obokye: Mana wawa kyende owo, ya mumana. Ekpele yonyo tekokyi iekatela. [

²¹ Kasi bakokyi itokolo bolobo pha ndengye mena nde na ibondele na ná imiima ntoma.]»

Yesu akuli imola bo wamowaa yo na bo wa mokundwa yo

²² Mokolo monomo baekosi bamba yaangana bée baso o Galileya. Yesu amba ya wo na bée yokye: «Bamoamba Nwana wa Moto o maboko ma bato. ²³ Baamoboma, kasi o sima ya nkolo iyato amokundwa o nte ya bawe.» Emba baekosi baokaka ngongo boikye.

Iphuta mputi ya Tempelo

²⁴ Waakoma Yesu na baekosi bée o Kapalanauma, bato baaphutisa mputi ya Tempelo, bamba ya waali Petelo. Bamba motuna bėkye: «Moteye wa bée kaphute mputi ya Tempelo?»

²⁵ Petelo amba ya buya yokye: «Ee, kaphute.» Waanyolo Petelo o ingambi, Yesu amba ya wo ne yokye: «Simo, kounyana bo? Ookokyi iphuta mputi ya mokonzi nwa mokyisi nza? Baalombo nde babutu?»

²⁶ Petelo amba ya mobuyisa yokye: «Babutu.» Emba Yesu amba ya wo ne yokye: «Bo baabona, baamokyisi tebaaphute.

²⁷ Ka pho banga sabatungyisa, kyende lobo o maa maanene, swe eya motata we iimba, oetakole munoko, wa mowene phalanga eya ebuni, oekpe, ophute mputi pho ya banga na we.»

18

Olekyi na ngambo nza?

¹ Mokolo monomo baekosi bamba ya waali Yesu, bamba ya motuna bėkye: «Oolekyi na ngambo o Bokonzi pha ikolo nza?»

² Yesu amba ya banga nwana omokye, aesi ya moteye onte ya be.

³ Amba ya wɔ yokye: «Nde phele nawɔ na bɛɛ ngakye: Bo mobesi ηwa bɛɛ temobuto ndokolo ηwaka bana baakyee phe, otonyɔɔ o Bokonzi pha ikolo.

⁴ Oolekyi na ngambo o Bokonzi pha ikolo, eli moto ookomiuya na ookobutwe ndokolo ηwana oyo.

⁵ Emba na moto nza, owa moyamba ηwana omookyee phɔ ya nga, mena anzambi nde nga mampenza.»

Sakyela bofe

⁶ «Ka moto nzaa owamokosa baakyikyī baba baanzanole obokye bakyele bofe, elekakyi na bola obokye batingya moto me ibanga sinene o nkyingo, bamovakye o ebale.

⁷ Ngɔngɔ boikye na bato ba mokyisi, na ndengye ekyekyele bɛɛ obokye bɛbi bakyele masumu. Maphɔɔ ma ndengye mena temakokyi izanga; kasi ngɔngɔ boikye eli na moto okokyele obokye bɛbi bakyele masumu.

⁸ Bo ebokɔ ya we naa ekolo ya we kyee-tome ikyela bofe, oetene, phɔ elekyi na bolaa inyɔɔ o lola na ebokɔ yɔnyɔ naa ekolo yɔnyɔ na ikyende na mabokɔ mabale na ná makolo mabale o lifelo, o ηwenya mote mozime.

⁹ Ka bo ziyo sa we sietome ikyela bofe, osiphengɔɔ kosivakye itakye na we, phɔ elekyi bolaa phɔ ya we inyɔɔ o lola na ziyo sɔnyɔ, na ikyende na miyo masɔ mabale o ηwenya ηwa lifelo.»

Ete ya mpate eebungyi ezwa

10 «Kyeɓa na iwene mɔnɔmɔ na bana baba phaa; naewɔle phɔ banze ba bɛɛ baabatele bateme imbelele siso o boo pha Tata oli o ikolo.

[

11 Phɔ Nwana wa Moto aesi ya bikya baabunga.]»

12 «Bɛɛ koununya bo? Bo moto mɔnɔmɔ ali na mampate munkama, bo yɔnɔyɔ ebungyi, etaikye ika makoo ibuya mbuka ibuya o ikolo sa ngomba phɔ akye luka eebungyi?

13 Nde phele nawɔ na bɛɛ ngakye: Bo aezwe, amobaa na nkyisa phɔ ya mpate me ileka nkyisa iibakyi ne phɔ ya mampate mako ibuwa mbuka ibuwa matemaikakyi bunga.

14 Nde bomɔ, Ango wa bɛɛ ooli o ikolo taazingye obokye na mɔnɔmɔ na bana baba abungye.»

Bo nwebi aekyesi boɓe

15 «Bo nwebi aekyesi boɓe, kyende oka ye, omoweninya boɓe boekyesi yo bɛɛ babale. Bo aeyokyi, mena akuli butwa nwebi na we.

16 Kasi bo ale iyeyoka, kpa moto mɔnɔmɔ naa babale, phɔ “batene bolombe nde minɔko ya manzoka mabale naa maato.”

17 Kasi bo aleɛ ibaoka, oloimole o ingomba. Emba bo ambi le ioka ingomba, omowene ndokolo mopakano naa ndokolo moputise wa mputi.»

18 «Nde phele nawɔ na bɛɛ ngakye: Maphɔɔ masɔ maamoanola bɛɛ wawa o se, ne Nwaphongo aamaanola o ikolo; ka maphɔɔ

maso maamole b̄e wawa o se, Nwaphongo ne aamale o ikolo.

¹⁹ Nakule wo na b̄e ngakye: Bo o mokyisi mumu, bato babale onte ya be, baokaa ibondere pho ya inzonga ekpele, Tata owa ikolo aabaphe yango.

²⁰ Pho elele eso eangaa bato babale naa baato na nkombo ya nga, nali onte ya be.»

Ete ya moto wa etoma otookyele bebi ngongo

²¹ Emba Petelo amba yaa phenephe na Yesu, amba ya motuna yokye: «Nkolo, bo nwebi na nga ankyesi fobe esengyesi obokye na molimbisa mbala bo? Ekokyi ibaa mbala sambo?»

²² Yesu amba ya mobuyisa yokye: «Phe, siiwo na we obokye mbala sambo, kasi mbala mako sambo mbala sambo.

²³ Yango mena, Bokonzi pha ikolo pha ulana na mokonzi monomo owa bangaka bato b̄e baetoma, pho akyekye maphoo ma mabongo ma be.

²⁴ Waatata yo ikyeka maphoo me, bamoyelesi na moto wa etoma monomo owa baka na mbongo enene.

²⁵ Moto me tabaka na baphalanga baiita mbongo me. Yango mena mokonzi nwe amba ya toma obokye, bamoungya ndokolo moombo na nwanwasi na bana ba be, ebe na mbolo ye, pho ya iita ena mbongo.

²⁶ Moto wa etoma mona, amba ya kusama na mabongo; amba wo yokye: “Mokonzi inzuyisa moo, impe banaa nkolo, namwita mbongo ya we eso.”

²⁷ Mokonzi aesi ya mooka ngongɔ, amolimbise, nɔnɔ waamole yo akye.

²⁸ Waatɔkɔlɔ moto wa etoma mɔna, akye vana na nwebi ne wa etoma owa baka na ηwana mbongɔ ye ekyikyɪ ya baphalanga. Amoakye o ηwesi, abuto imunyata na bokusi, amba ya wɔ yokye: “Iita mbongɔ ya nga!”

²⁹ Nwebi ne amba ya kusama na mabongɔ, amba ya nyingonela ne yokye: “Inzuyisa mɔɔ, impɛ bana nkɔlɔ, namwita mbongɔ ya we!”

³⁰ Kasi yo taikaka anola, amba kye munyɔsa o bɔlɔkɔ tee nɔnɔ mokɔlɔ ηwa iita yo mbongɔ ye.

³¹ Waawene bato baetoma baayɔkɔ baabona, bawenekye ngongɔ boikye, bamba yakye imola mokonzi ηwa be.

³² Mokonzi amba ya banga moto wa etoma me, amba ya wɔ ne yokye: “Oli moto wa etoma mobe! Wabaka na mbongɔ ya nga, na elimbisaka phɔ wanyingonelaka na nga.

³³ Nawe nga osengyelakyi iyokyela nwebi na we ngongɔ bo wa eyokyelaka nga ngongɔ.”

³⁴ Mokonzi aokaka yɔ, amba ya nyɔsa moto wa etoma me o bɔlɔkɔ, tee nɔnɔ mokɔlɔ ηwa mwita yo mbongɔ ye.»

³⁵ Yesu amba ya wɔ yokye: «Tata ooli o ikolo amoekyela nde bomɔ, bo mɔnɔmɔ onte ya bɛɛ talimbise nwebi ne na ndondo yɔnɔyɔ.»

19

Mateya ma Yesu phɔ ya Lowɔ lookyekyi iboma bolonga

¹ Waaunva Yesu iwo maphoo mamana, amani o Galileya, aesi ya kyende o manyete ma Yuda mali o mokukulu mooyoko nwa ebale ya Yaladene.

² Moluku nwa bato moikye nwamba ya mobenga o mo, amba ya babikya.

³ Bafalisayi baayoko bayakaka oli Yesu pho ya imumeka, bamba ya motuna bekye: «Mibeko ma banga mianole obokye lele akokyi ile nwasi we nde pha babona?»

⁴ Yesu amba ya babuyisa yokye: «Be naino totangyi buku pha Nwaphongo? “O etatele ya mokyisi, Nwaphongo akyelaka nwanwasi na lele.”

⁵ Emba, amba ya wo yokye: Yango mena, lele amoika nyango na ango, amokye angana elele yonyo na nwanwasi we, pho bee baso babale babutwe moto monomo.

⁶ Nde bomo, tebakuli ba bato babale, kasi babuto moto monomo. Emba bo Nwaphongo ambo angyinya nwanwasi na lele, moto sa bakabinya.»

⁷ Bafalisayi bamba ya motuna bekye: «Ka pho ya ye Mose ahekye nzela obokye bo lele kale nwanwasi na bolonga, asengyesi imokomela mokanda moteya obokye bolonga bowe?»

⁸ Yesu amba ya babuyisa yokye: «Mose ahekye nzela ya ile babasi pho ya nzoto bokusi ya bee. Kasi uta o etatele teyaikaka baa babona.

⁹ Kasi nga na wo bee ngakye: «Bo lele ale nwasi we, bo te ebe nde pho ya bondumba phe, akyee longa mosuu, mena kakyele phemba.»

¹⁰ Baekosi bee bamba ya wo ne bekye: «Bo

mobeko nwa bolonga mobee babona, elekyi na bolaa iba salonga.»

¹¹ Yesu amba ya babuyisa yokye: «Teli bato baso baakokyi isosolo mateya mama, manya nde baaunva phe Nwaphongo bokusi pha imaanola.

¹² Maphoo mali maikye, maakatele moto salonga. Bakyi tebaalongwe pho banyiba bompele tata o ibotama, bana bababoma bompele, baayoko te balongye pho bamiambya muwosi pho ya Bokonzi pha ikolo. Moto oakokyi ianola mateya mama, amaanole!»

Yesu atandesi bana bakye maboko

¹³ Mokolo monomo bato bayeleli Yesu bana ba bee pho abatandele maboko ambe na bondele pho ya be, baekosi bamba bakatela.

¹⁴ Kasi Yesu amba ya wo yokye: «Le bana bakye baye oka nga, le bakatela, pho Bokonzi pha ikolo boli pho ya bato bali ndokolo bana bakye.»

¹⁵ Waabatandela yo maboko, amba ya mana wamo.

Moto wa ezwele

¹⁶ Moto monomo amba yaa oli Yesu, amba ya motuna yokye: «Moteye, lowo'ye loolaa, losengyesi nga ikyela pho na zwe bomoo pha bobele?»

¹⁷ Yesu amba ya mobuyisa yokye: «Pho ya'ye kontune pho ya lowoo loolekyi bolaa? Ooli molaa nde Nwaphongo. Boozingyi inyolo o mokyisi nwa bomoo, kumola mibeko.»

¹⁸ Moto me amba ya motuna yokye: «Mibeko ye?» Yesu amba ya mobuyisa yokye: «Saboma

moto, sakyela baphemba, saiba, sakatela moto boole,

¹⁹ kumola nyongɔ na ongo, zinga mobubaa na we bo komizingye we mampenza.»

²⁰ Munzenga me amba ya wo ne yokye: «Nakumole mibeko miso maamina. Nakule kyela'ye?»

²¹ Yesu amba ya wo ne yokye: «Bo ozingyi iba moto o molaa kyende kye ungya mbolo ya we iso, ombe kabela babola bana baphalanga. Emba waamba ba na ezwele o ikolo. Sima, yaka ya mbengye.»

²² Kasi waaoka munzenga mona baabona, aesi ya butwa na ngongɔ pho abaka moto wa ezwele iikye.

²³ Emba Yesu amba ya wo na baekosi bee yokye: «Nde phele na wo na bee, wali nkamba pho ya moto wa ezwele inyolo o bokonzi pha ikolo.

²⁴ Nakule wo na bee bofo: Wali nkamba pho ya nyama enene boli shamo iinyolo o iluu sa solu. Kasi nkamba kyikule lofo pho ya moto wa ezwele inyolo o bokonzi pha Nwaphongo.»

²⁵ Waaoka baekosi maphoo me, bamba kamwa na boikye, bamba ya wo bekye: «Bo ebe babona, ombi koka ibika nza?»

²⁶ Yesu abakyekyi, amba ya wo na bee yokye: «Moto takoyi imibikya nde yo mapenza, kasi eli nde Nwaphongo ookoyi ikyela maphoo maso.»

²⁷ Emba Petelo amba ya kpa maloba yokye: «Kyeka, banga baba toikyika iso yaabaka na banga, tobuto ikyemiebenga, ekpele'ye eya mozwa banga?»

²⁸ Yesu amba ya babuyisa yokye: «Nde phεε na wɔ bεε ngakye: Imbεε saamozala Nwana wa Moto o eziye ye ya ngambo, o mokyisi ηwaa sika, bεε bambengakyi, wa mozala na bεε o biziye iko mbuka bibale phɔ ya itenaka malombe ma mabota iko mbuka mabale ma Isalayεε.

²⁹ Ka moto munso oikyika ingambi se, ebe banaa nyango, ebe nyango na ango, ebe bana bε, na manzabi mε, phɔ ya nkombo ya nga, amozwa mbolo mε mbala munkama, amba na zwa bomɔɔ pha bobεε.

³⁰ Bato baikye baali lolɔ eye o boo, bamobutwa o sima. Kasi baali lolɔ o sima bamobutwa o boo.»

20

Bato baetoma o inzabi sa vinyɔ

¹ «Okyemela yaamokyela Nwaphongo o bokonzi pha ikolo, ya mɔba ndokolo moto mɔnɔmɔ ootɔkɔsi na mumbengu phɔ ya ikye luka bato ba imokyelela etoma o inzabi se sa vinyɔ.

² Aesi ya okana na bεε obokye: Bamozwa mbano ya ebende yɔnɔyɔ ya baphalanga boophute bεε phɔ ya mokɔlɔ mɔnɔmɔ ηwa etoma, amba ya batoma o inzabi se sa vinyɔ.

³ O ngonga ya ibuwa ya mumbengu, akuli ya tɔkɔlɔ, akye zwa bato basuu bazasi o munsongo sa etoma ya ikyela,

⁴ amba ya wɔ na bεε yokye: “Na bεε kye kyela o inzabi sa nga. Namoephe mbano eekokyi.”

⁵ Na βέε βamba ya kyende. Wa koma bunya o moto, na wa ngonga eya iyato ya nkokolo, akulaka kyela nde bomo.

⁶ O ngonga ya itano eya nkokolo, akuli tokolo akye zwa bato basuu bazasi o munsongo. Amba ya batuna yokye: “Pho ya'ye ozasi wawa nzanga mobimba sakyela etoma?”

⁷ Βέε βamba ya mobuyisa βekye: “Moto wa ilokpa o etoma tali.” Amba ya babuyisa yokye: “Βε kye kyela o inzabi sa nga.”»

⁸ «Waatata iyinda bunya, mokolo inzabi aesi ya wo na kapita yokye: “Banga bato baetoma baso, obaphute. Tata na baakpakyi nga sima, oombe bomela na baakpakyi nga o boo.”

⁹ Bato baatataka ikyela etoma o ngonga eya itano ya nkokolo, baesi ya zwa moto na moto ebende yonyo ya baphalanga eekokyi na iphuti sa mokolo mobimba.

¹⁰ Waakoma imbele sa batataka ikyela etoma, baumunyaka obokye bamozwa baphalanga ileka βebi. Kasi babaphēkye nde ebende yonyo ya baphalanga ekokyi na mokolo mobimba.

¹¹ Waakpa βέε baphalanga, babuto imiima na mokolo inzabi.

¹² Bamba ya wo ne βekye: “Bato baetoma baasukakyi we ipka bakyesi etoma nde ngonga yonyo, o baphuti na banga nde ndengye yonyo. Kasi banga tokyesi etoma mokolo mobimba, tophēmbi na ná moo mokusi!”

¹³ Kasi mokolo inzabi amba ya buyisa monomo na βέe yokye: “Nwebi na nga, siikyi ekyela bofe, tolookanakyi nga na we na ebende yonyo ya baphalanga pho ya mokolo mobimba?”

14 Kpa baphalanga ba we, kyende. Na zingye iphuta okpakyi nga sima boephuti nga.

15 Ya bo'ye! Eli baphalanga ba nga, sikokyi ikyela na bée boozingyi nga? Ookyi zuwa pho nali moto molaa?"

16 Yango mena, Yesu amba ya sukya bobo: Bato baali o sima bamobutwa o boo, kasi bali o boo bamobutwa o sima.»

Yesu akuli imola mbala eya iyato bo wa mowaa yo na bo wa mokundwa yo

17 Waaba Yesu kakyende o Yelusaleme, o nzela, amba ya wo na baekosi iko mbuka babale yokye:

18 «Okyemela, unwanwa eye, tokyende o Yelusaleme, om, nga Nwana wa Moto, bamunzambya oka bakonzi ba banganga ba Nwaphongo, na bateye ba Mibeko, bamuntenela bolombe pha iwaa.

19 Bamba na nzambya oka bato baatebali Bayuda, bamunzakya, bamumbinda phimbo, baamba na mbaka o ekulusu. Kasi sima ya nkolo iyato namokundwa.»

Ionga sa nyango wa Zake na Yoane

20 Bobele, nwanwasi wa Zebede aesi ooli Yesu na bana bée babale ba bampele, amba ya kusama o boo phe, pho ya imonga lowo lonolo.

21 Yesu amba ya motuna yokye: «Kozingye'ye?» Nwanwasi wa Zebede amba mobuyisa yokye: «Indakyele obokye o bokonzi pha we, bana banga ba bampele baba bamozala monom o boloo pha we, omoyoko o bowee pha we.»

22 Yesu amba ya buya yokye: «Toebe lowo loongye b̄e. B̄e okokyi inywa kopho ya bolosi eya munywa nga?» Bamba mobuyisa bekye: «Tokokyi.»

23 Emba Yesu amba ya wo na b̄e yokye: «Eli phele, kopho eyamunywana nga na b̄e wa moenywa me. Kasi iyolo moto owa mozala o boloo naa o bowee pha nga tekyekyi nga, pho Tata aunva bongya bilele baabina pho ya bato baolo yo.»

24 Waoka baekosi iko bayoko lowo me, baokyelaka bola na mosi yo.

25 Emba Yesu amba ya babanga b̄e baso wali yo, amba ya wo na b̄e yokye: «Koebe obokye bakonzi ba nkyisi, bakonza bato ba be, na bato baanene baweninya bato ba b̄e mpasi.

26 Nzuka onte ya b̄e, yango saba babona. Bo monomo na b̄e kalukye imibuya moto munene, esengyesi obokye abe moto wa etoma wa b̄e.

27 Nde bomo, bo monomo na b̄e kazingye iba o bo, esengyesi obokye abe moombo nwa b̄e.

28 Pho nga Nwana wa Moto siika yaa pho bato bankyelele, kasi na yaa nde obokye nabakyelele, nambe naambya bomo pha nga pho yaiikola bato baikye o boombo.»

Yesu abikye bato babale baapholo miyo

29 Waatokolo b̄e o Yeliko, bato baikye bamba ya benga Yesu.

30 Bato babale baapholo miyo bazalaka o mbale ya nzela, waoka b̄e obokye Yesu kalekane, bamba tata iyaanwana bekye: «Nkolo, Nwana wa Davidi, olookyele ngongo!»

³¹ Bato baikye baphaphalaka na βε, βεkye: «Kanga munoko!» Kasi βέε bakulaka aηwana na bokusi βεkye: «Nkolo, Nηwana wa Davidi, olookyele ngongo.»

³² Yesu amba ya τεμε, aesi ya βabanga, amba ya ω na βέε yokye: «Kozingye obokye nakyele'ye φo ya βέε?»

³³ Bamba ya mobuyisa βεkye: «Nkolo, kyela obokye miyo ma βanga maingwe.»

³⁴ Yesu amba baokyela ngongo, amba ya bakuma o miyo, nde mina wamo, bato βabale me βabuto iwene, βamba butwa ibenga Yesu.

21

Yesu anyosi o Yelusaleme

¹ Yesu na baekosi βέε baesi ya koma phenephe na Yelusaleme. Waakoma βέε o Betafaze o ngomba ya Baolive, Yesu amba ya toma baekosi βabale o boo. ² Amba ya ω na βέε yokye: «Kyende o mokyisi mooli o boo, bo okomi omo, wamowene ebembe ya mpunda baetingye na ηwana wa yango. Omaingole, oye na mango wawa.

³ Kasi bo moto aetuni, βέε omobuyisaka obokye: “Nkolo asengyesi na mango.” Amokula ebuyisa mango izele.»

⁴ Maphoo maamana makyelamaka φo ya ikokya maphoo mawoko moimosi wa Nwaphongo obokye:

⁵ «Wω na ηwana wa ηwanηwasi wa Siona obokye: Kyeka mokonzi ηwa we kaye. Kaye na

bonyile, abaa o ikolo sa mpunda na sa ηwana wa mpunda.»*

⁶ Baekosi bamba ya kyende, bakyekeyela nde bo wa woko Yesu na δε.

⁷ Bamba yaa na mpunda na ηwana wa yango, bawalaka bitobu ba δεε o ikolo sa mango, Yesu amba ya zala iβε.

⁸ Moluku ηwa bato mwikye babaka bawale bitobu ba δεε o nzela, baayoko batenaka nkanga, bailangyaka o nzela. ⁹ Bato baatambulaka o boo pha Yesu na baamobengaka o sima, babaka baanwane δεkye: «Nkyemo na Nwana wa Davidi! Ookoye na nkombo ya Nkolo apambolame! Nkyemo o bilele biilekyi ikolo!»

¹⁰ Waanyolo Yesu o Yelusaleme, mokyisi munso ηwanyinganaka, bato bamba tunana δεkye: «Moto oyo kane baa nza?»

¹¹ Bato baayakaka na Yesu bamba buya δεkye: «Eli Yesu moimosi wa Nazarete o Galileya.»

Yesu anyosi o Tempelo

¹² Yesu aesi ya nyolo o Tempelo, atati iwi-inya baungye na baombi ba mbolo omo, amba ya bumbya ba mesa ma baendinye ba baphalanga. Akuli na bumbya biziye ba bato baungya makoto-ηwenya.

¹³ Amba ya wo na δεε yokye: «O buku pha Nwaphongo wakomama bofo: “Bamobanga ingambi sa nga, ingambi sa losambo.” Amba kula bakya yokye: Beε osibuye elele ya faibi.»

* **21:5 21:5** Nwana wa ηwasi wa Siyona kyelukye iwo obokye bato baa mokyisi ηwa Siyona (Yelusaleme).

14 Bato baapholo miyo na baatono makolo bamba yaa oli Yesu, amba babikya.

15 Bakonzi ba banganga ba Nwaphongo na bateye ba Mibeko baokaka yoo, wawene bée bilekyesako biakyelaka Yesu na bana baabaka baanjwane o Tempelo obokye: «Nkyemo na Nwana wa Dawidi!»

16 Emba bamba ya wo na Yesu bekye: «Kookye maphoo maawo be?» Yesu amba ya babuyisa yokye: «Ee, naokye. Bèe naino totangyi o buku pha Nwaphongo? Bo wakoma bée bobo: “Oteye bana bakye na baanywangye ndengye eekokyi bée iekumbela?”»

17 Bobele, aikyi baika, atokosi o Yelusaleme akye milangya o Betani.

Yesu awambi nwete nwa fige

18 Mokolo nwa sima, waaba Yesu kakule butwa o Yelusaleme, aesi ya oka nzala.

19 Amba ya wene nwete monomo nwa fige imbale ya nzela, amba susana phenephe na nwango, akye zwa nde maakyi na maakyi. Amba ya wo na nwete me yokye: «Otokule bota mbuma!» Nde o sina imbele me, nwete nwa fige moungyi.

20 Waawene baekosi babona, bamba kamwa na boikye. Bamba ya tuna Yesu bekye: «Pho ya'ye nwete mumu moungyi na mbala yonoyo bobo?»

21 Yesu amba ya babuyisa yokye: «Nde phele na wo na bée ngakye: Booli phele na ianola, bo toikyi ziko, okokyi ikyela maphoo maakyesi nga na nwete nwa fige. Okokyi na iwo na ngomba

eye obokye: Mana wawa, kyende kye mivaka o ebale enene! Wamokyelama.

²² Ekpele eso eya moonga bɛɛ na ibɔndɛɛ, bo oanosi obokye wa moezwa, waamba na ezwa.»

Owa phe Yesu bokonzi nza?

²³ Yesu aesi ya nyɔɔ o Tempelo, atati iteya bato. Bakonzi ba banganga ba Nwaphongo na bankumu ba bato, bamba ya susana oli yo, bamba ya motuna bɛkye: «Kokyele maphɔɔ mama na bokonzi'ye? Oephe bokonzi pha ikyela maphɔɔ me nza?»

²⁴ Yesu amba ya babuyisa yokye: «Na nga, nae-tune nde motuna mɔnɔmɔ. Bo ombuyise eyano, emba na moeyimola na bokonzi ye bokyele na nga maphɔɔ mamana.

²⁵ Owa tomaka Yoane ifatisa bato nza? Ya motomaka Nwaphongo ndee bato?» Kasi bɛɛ babutwaka iwɔnɔ bɛɛ na bɛɛ bɛkye: «Bo tobuye obokye yamotomaka Nwaphongo, amokula lotuna yokye: Toikaka anola Yoane phɔ ya'ye?

²⁶ Bo toonimobuyisa obokye: Ya motomaka bato, toile tɔkɔ na bato, phɔ bato basɔ baanolaka obokye Yoane ali nde owa kolo moimosi wa Nwaphongo.»

²⁷ Yango mena, bamba mobuyisela bɛkye: «Toloebe.» Emba Yesu amba ya wɔ na bɛɛ yokye: «Na nga me esieyimole naa nakyele maphɔɔ mama na bokonzi pha nza.»

Ete ya bana ba bampele babale

²⁸ Yesu amba kula ya wɔ yokye: «Bɛɛ koumunya bo phɔ ya maphɔɔ mama? Moto mɔnɔmɔ abaka na bana ba bampele babale,

aesi ya banga owa bola, amba ya wo ne yokye: “Nwana wa nga, lolu kyende kye kyela o inzabi sa vinyo.”

²⁹ Nwana amba ya buya yokye: “Nale, esi-ikyende.” Kasi o sima aumunye, aesi ya kyende o inzabi sa vinyo.

³⁰ Akulaka wo na owa ibale nde bomu. Owa ibale amba buya yokye: “Ee Tata, na mokyende.” Kasi taika kyende.

³¹ Onte ya bana babale baabana, okyesi mapho maazingye ango wa bee nza?» Bamba ya mobuyisa bekye: «Nwana owa boo.» Emba Yesu amba ya wo na bee yokye: «Nde phele na wo na bee ngakye: Baphutise ba mputi na mandumba, bamunyolo o bokonzi pha Nwaphongo o boo pha bee.

³² Pho, Yoane Mobatise ayakaka yaeteya nzela elaa, kasi bee toikaka moanola. Kasi baphutise ba mputi, ebe na mandumba ba moanoleleka, ka bee na bo wawenekye bee babona, toika bongola mandondo pho ya imoanola.»

Ete ya bato baetoma babe o inzabi sa vinyo

³³ «Okyemela ete esuu. Moto monomu abalaka inzabi sa vinyo, aesi ya silungya na kyengyete. Amba ya tima ibela o mabanga pho ya ikyela isungu sa iyamola mbuma ya vinyo. Atongaka na ingambi sonso o ngomba pho ya moto okokyengyete sina inzabi. Sima, amba ika siikyela bato obokye basiphutele, yo akye o imbanga.

³⁴ Waakoma imbele sa inoko mbuma, mokolo inzabi aesi ya toma bato baetoma bee oka bato

baaphutele inzabi obokye bakye mokpela iyalo saaka ye.

³⁵ Kasi baaphutele inzabi baakye basali me, bakutubi mōnōmō, babomi oomoyōkō, owa iyato bamobomi na mabanga.

³⁶ Emba mokolo inzabi amba kula toma bato basuu baikye ileka baaphanza, kasi baaphutele inzabi bakulaka bakabela nde bomō.

³⁷ O sima ya bée basō, amba ya batomela ηwana we mōnōmō. Aumunyaka obokye: “Bamokumola ηwana wa nga.”

³⁸ Kasi waamowene baaphutele inzabi, bawōnōkō onte ya bēē bekye: “Kyeka somi ye, owa moikala na sina inzabi bo ango awe! Yaka tomobome, inzambi me samobutwa sa banga.”

³⁹ Baesi ya moakya, bamovakyi o selekye ya inzambi, bamobomi.»

⁴⁰ Yesu amba ya batuna yokye: «Emba waamoya mokolo ηwa inzambi, amokyela ye phō ya basali babana?»

⁴¹ Bamba ya mobuyisa bekye: «Etabaokye ngōngō. Aababoma bée basō, aamba phe inzambi oka baphutesi basuu. Emba bato me bamobaka bamophe mbuma o imbele siikokyi.»

⁴² Emba Yesu amba ya wō na bée yokye: «Bee toika tanga maphōō mama o Buku pha Nwaphongo? Bakoma bobo:

“Ibanga saavakaka batongyi ba mangambi, sibuto ibanga siiphisi ingambi sisō.

Mena etoma ya Nkolo.

O miyo ma banga eli lowō la ikamwa!”»

⁴³ Yesu amba kula ya bakya yokye: «Yango mena, na wɔ na bɛɛ ngakye: Bamoeɓɔlɔlɔ bokonzi pha Nwaphongo, baamba bophe bato basuu, bɛɛ baabokyelela etoma elaa. [

⁴⁴ Owa mokaa o ikolo sa sina ibanga, amokye mitenya binango, kasi bo ibanga me sikaa o ikolo sa moto mɔnɔmɔ, saamowɔlingyinya.]»

⁴⁵ Bakonzi ba banganga ba Nwaphongo na bateye ba Mibeko baaokyi bite bibale me, baefaka obokye, Yesu kawɔ phɔ ya bɛ.

⁴⁶ Emba famba tata iluka malondo ma imwakya, kasi ba ilaka bato, phɔ bato babaka bakpe Yesu ndokolo moimosi wa Nwaphongo.

22

Ete ya eseleko ya bolonga

¹ Yesu akulaka wɔle bato baamookye na bite bisuu yokye:

² «Kyeka bo wamolekana maphɔɔ o Bokonzi pha ikolo. Ya moba ndokolo mokonzi mɔnɔmɔ akyesi eseleko ya bolonga pha njwana we.

³ Atomi bato ba etoma bɛɛ obokye bakye oka bato baabangaka yo, phɔ baye o eseleko, kasi bɛɛ basɔ bale iyaa.

⁴ Akulaka toma bato ba etoma basuu, amba ya wɔ na bɛɛ obokye bakyeɛnde wɔ na bato baabangaka yo bobo: “Naumbo bongya mbolo iso, nabomi ngombe ya nga, na manyama maaisa. Yaka o eseleko ya bolonga.”

⁵ Kasi bɛɛ basɔ baweni lowɔɔ me nde pha, mɔnɔmɔ na mɔnɔmɔ akye o etoma ye, omoyoko akye o manzabi, ona akye kyela mumbongu.

⁶ Baayoko baakye bato ba etoma babana, ba banyokosi, ba babomi.

⁷ Mokonzi aokyi yoo, amba toma batuluku be, pho bakye boma babomi babana, batumbe na mokyisi njwa be.

⁸ Sima amba ya wo na bato ba etoma bee yokye: “Na bongyakyi eseleko na bolaa, kasi bato baabangakyi nga tebaikyi ya zaa.

⁹ Kyende o nsongo iso inene, obangye bato baamowene be, pho baye o eseleko.”

¹⁰ Bato ba etoma baesi ya kyende o nsongo bamba yaa na bato baso baakyebye zwa bee omoo, ebe bato balaa, na bato baabe, nono watondaka ingambi sa eseleko.»

¹¹ «Waanyolo mokonzi ikye kyeka bato baabangaka yo, akye wene moto monomo taikaka lata etobu ya eseleko.

¹² Emba, amba ya motuna yokye: “Iwe onyosi wawa ndengye'ye? Toikiya lata etobu ya eseleko.” Kasi moto me taikaka zwa lowoo la ibuya.

¹³ Bobele mokonzi amba ya toma bato ba etoma bee yokye: “Omokangye maboko na makolo, omovakye o ibanda o enzombi amokye lela, amokye twa mino.”

¹⁴ Yesu amba ya sukya bofo: “Nde phele, bato baikye babangama, kasi baaolo bee bali ba itanga.”»

Mputi ya mokonzi njwa Loma

¹⁵ Bafalisayi bakyebye angana ikyita pho ya iluka malondo maiyakya Yesu na maloba me mampenza.

¹⁶ Batomaka baekosi ba bée basuu na bato ba Elode pho bakye tuna Yesu obokye: «Moteye, toebe obokye iwe kowo nde phele, toile na moto, iwe tookyekye na ngambo ya moto, kasi koteya nde phele ikyiongye Nwaphongo.

¹⁷ Oloimole, koumunya bo, mobeko nwa banga nwanmba nzela ya iphuta mputi ya mokonzi nwa Loma nde phe?»

¹⁸ Kasi Yesu aebaka malondo ma bée maabe. Amba ya wo na bée yokye: «Banyamabole. Pho ya'ye komekye?

¹⁹ Taateya baphalanga baphute na bée mputi.» Bamba moteya ebende ya baphalanga yonyo.

²⁰ Emba Yesu amba ya batuna yokye: «Boo boho na nkombo eyakoma bée wawa ili ya nza?»

²¹ Bamba ya mobuyisa bekye: «Ya mokonzi oo munene wa Loma.» Emba Yesu amba ya wo na bée yokye: «Yaaka mokonzi nwa Loma, oiphe mokonzi nwa Loma, yaaka Nwaphongo, oiphe Nwaphongo.»

²² Waaoka bée babona, bakamwaka na boikye, baikiyi mwika bakye.

Motuna pho ya ikundwa sa bawe

²³ Nde o muna mokolo me, Basadukayi baesi waali Yesu. Eli bée bato bawo obokye, bato baawaa ete baakundwe.

²⁴ Bamba motuna bekye: «Moteye, Mose awoko yokye: “Bo moto awe taikiyi bota bana, nwana nyango na mowe asengyesi ilonga bozengye me, pho abotele nwana nyango bana.”

²⁵ Oka banga, yabaka bampele sambo, bée baso nyango monomo, ango monomo. Nwana

owa bola alongyi nwanwasi, awe taikiyi bota na nwanwasi bana, aikiyi bozengye me na nwana nyango.

²⁶ Wakyelamaka nde bomɔ na owa ibale na owa iyato, tee nɔnɔ owa sambo.

²⁷ O sima ya bɛɛ baso, nwanwasi me aesi ya waa me.

²⁸ Emba mokolo nwa mokundwa bawe, nwanwasi me amoba wa nza? Pho bɛɛ baso bamolongaka.»

²⁹ Yesu amba ya ba buyisa yokye: «Be omikose, pho toebe na maphɔɔ maali o buku pha Nwaphongo, toebe na bokusi phe.

³⁰ Pho waamokundwa bawe, malonga ete makule baa, ba basi na bampele bamoba ndokolo baanzelu ba ikolo.

³¹ Kasi pho ya lowo lokyekyi ikundwa sa bawe, toika tanga bo wawoko Nwaphongo na be?

³² Awo bobo: “Nali Nwaphongo wa Abalayama, wa Izake na wa Yakobo.” Yo tali Nwaphongo wa bawe kasi ali Nwaphongo wa bato bali na bomɔ.»

³³ Bato baso baamokaka, bakamwaka na mateya me.

Mobeko molekyi miyoko

³⁴ Wa oka Bafalisayi obokye Yesu asukise Basadukayi, bamba ya angana waali yo.

³⁵ Mɔnɔmɔ onte ya bɛɛ abaka moteye nwa mibeko, alukaka malondo ma imeka Yesu, amba ya motuna yokye:

³⁶ «Moteye, onte ya Mibeko miso ma Nwaphongo, mobeko'ye molekyi miyoko?»

37 Yesu amba mobuyisa yokye: «Osengyesi izinga Nkolo Nwaphongo wa we na ndondo yonoyo, na molimo njwa we muso na ná maumunya ma we maso.

38 Mena eli mobeko njwaa boo, na moolekyi bonene.

39 Mobeko njwa ibale mookokaa na njwa boo, nwe mumu: Osengyesi izinga nwebi na we, booko mizingye we mampenza.

40 Mibeko ma Mose na mateya ma baimosi ba Nwaphongo mali nde onte ya mibeko mibale mamina.»

Masiya na Davidi

41 Bafalisayi baanganaka elele yonoyo, Yesu amba ya batuna motuna mumu:

42 «Bee koununya bo pho ya Masiya? Iyo ali njwana wa nza?» Bamba ya mobuyisa bekye: «Ali njwana wa Davidi.»

43 Yesu amba ya wo na bee yokye: «Ndengye'ye Davidi wakambemaka yo na Bolobo, amobangaka “Nkolo?” Waawo yo obokye:

44 “Nkolo Nwaphongo awo na Nkolo wa nga yokye: Yaka ya zale o boloo pha nga tee nono waamouya nga banguna ba we o se ya makolo ma we.”

45 Bo Davidi amobangaka “Nkolo”, ka ndengye'ye Masiya akokyi ikula baa njwana wa Davidi?»

46 Monomo na bee takokaka na imobuyisa na lowo lonolo, tata mokolo me, moto takulaka meka na imotuna na mituna.

23

Bateye ba Mibeko na Bafalisayi banyamabole

¹ Emba, Yesu amba ya wo na bato baso na ná baekosi bée yokye:

² «Bateye ba Mibeko na Bafalisayi, etoma ya bée nde ilimbolela bato Mibeko ma Mose.

³ Bèe osengyesi ikumola na ikyela iso yaamowo bée na bèe kasi bèe samekola mobesi nwa be, pho tebaakyelele iikyiteya be.

⁴ Bakangye biphesi bizito bili na nkamba pho ya ibinyanya, baambe biphisa bato o mabekye, kasi bée mampenza tebaabikume nono na munse.

⁵ Bitoma biso biikyele be, balukye nde obokye bato ba bawene. Bitee ba nkanda ya Nwaphongo bilate bato o imbèle si sambele be, bée ba bibuya binene mpenza, bambe na bamba ma songya manene ma nkoto ya be. ⁶ Bazingye bilele ba ngambo o biseleko, na biziye ba o boo o mangambi ma makyita.

⁷ Bazingye bato bababeyakye o bilele biangane bato baikye, baambakye na babanga “bateye.”

⁸ Kasi bèe, sazingaka obokye baebangye “mot-eye”, pho bèe baso oli nde baekosi, oli nde na Moteye monomo.

⁹ O munse mumu sa banga moto monomo “tata”, pho oli nde na Ango wa bèe monomo, oli o ikolo.

¹⁰ Sazingaka obokye bato baebangakye “mokonzi”, pho oli nde na Mokonzi monomo yo Masiya.

11 Moto oelekyi b̀̀e baso, amoba moto wa b̀̀e wa etoma.

12 Moto okomitombe, baamounya, kasi moto ookomiuya, baamotomba.»

Yesu aweninyee b̀̀ole pha bateye ba Mibeko na Bafalisayi

13 «Ngongɔ ya b̀̀e, bateye ba Mibeko na Bafalisayi, banyamabole! Kozibele bato nzela eekokyi na b̀̀e inyolo o bokonzi pha ikolo. B̀̀e mampenza toonyolo, kombe na katela bato baazingye inyolo.»

14 [«Ngongɔ ya b̀̀e, bateye ba Mibeko na Bafalisayi, banyamabole! Koiyele mazengye na mbolo ya b̀̀e iso na malondo mabe pho ya ibomba bofe pha b̀̀e, kombe buzinya na ma bondesi maanda. Yango mena Nwaphongo amoephe etumbu eya moleka bonene!]

15 Ngongɔ ya b̀̀e, bateye ba Mibeko na Bafalisayi, banyamabole! Kokye mikyende mambanga mboka eso, na yaa mokyisi na yaa ebale pho ya iluka moanosi monomɔ, ka waamozwe b̀̀e, kokule mobuya moto wa lifelo koleka b̀̀e.

16 Ngongɔ ya b̀̀e, bato baapholo miyo baateya bato nzela. Pho ya b̀̀e kowo obokye: Bo moto akati seleka na nkombo ya Tempelo, seleka me eli pha. Kasi bo akati seleka na nkombo ya wolo ekyebombe yo o Tempelo, asengyesi ikumola seleka me.

17 Bibubusi bifi, bato baapholo miyo! Elekyi na ntina eli'ye, itela ndee Tempelo? Itela kabutwe ekpele eya ekyila nde onte ya Tempelo.

18 Kowɔ na obokye: Bo moto akati seleka na nkombo ya etumbelo seleka mɛ eli pha. Kasi bo akati seleka na nkombo ya ikabo sili o ikolo sa etumbelo, asengyesi ikumola seleka mɛ.

19 Bato baapholɔ miyo! Ikabo na etumbelo, elekyi iye? Ikabo sibutwe ekpele eya ekyila phɔ basikyesi o etumbelo.

20 Moto ookokate seleka na nkombo ya etumbelo, aekati phɔ ya etumbelo na phɔ ya mbolo iso iili o ikolo sa etumbelo.

21 Okokate seleka na nkombo ya Tempelo, aekati na nkombo ya Tempelo na ná nkombo ya Nwaphongo okozale omɔ.

22 Na okokate seleka na nkombo ya ikolo, aekati na nkombo ya eziye ya Nwaphongo, na ya Nwaphongo okozale miyango.

23 Ngongɔ ya bɛɛ, bateye ba Mibeko na Bafalisayi, banyamabolɛ! Komanyisa Nwaphongo iyalo sonoso onte ya maalo iko ma maakyi maa solo elaa. Kasi kobungye mibeko miilekyi minene booli: Ikyela bato bolaa, iyokyela bato ngongɔ, na ibaa bato bawɔ phɛɛ. Mena eli maphɔɔ masengyesi bɛɛ ikyela, kasi sa bunga maayɔkɔ.

24 Bato baapholɔ miyo bateyee ba nzela! Kokonde maleku ma bɛɛ phɔ ya imanya esala omokyiky, kasi komine shamo oomunene!

25 Ngongɔ ya bɛɛ, bateye ba Mibeko na Bafalisayi, banyamabolɛ! Kokunyole ba kɔphɔ na balako o ikolo kasi o motema itondi na mbolo ya iiba na maphowa mabe.

26 Mofalisayi owa pholɔ miyo! Kunyola kɔphɔ o motema phanza emba o ibanda wamokunywa

me.

²⁷ Ngongō ya bēe, bateye ba Mibeko na Bafalisayi, banyamaḅole! Waulana na malita mainga bēe mumpembe, mawenene malaa o ifanda, kasi o motema matonda na mpee ya bato ḅawaa na ná sokoto ndengye na ndengye.

²⁸ Na bēe o ifanda kowenene ndokolo bato ḅalaa o ḅoo pha Nwaphongo. Kasi o motema watonda na ḅoolē na ná ḅobe.

²⁹ Ngongō ya bēe, bateye ba Mibeko na Bafalisayi, banyamaḅole! Kotongyele baimosi ba Nwaphongo malita malaa, kobongya na malita ma bato ba bosembo.

³⁰ Kombe na wo obokye: “Bato ḅaabaka o imbele sa bankoko ba banga, nde toloangana na bēe pho ya iboma baimosi ba Nwaphongo.”

³¹ Baabona, bēe mampenza koanole obokye oli bankoko ba bato ḅabomaka baimosi ba Nwaphongo.

³² Unwanwa eye, emba unva etoma eya tataka bankoko ba bēe ikyela!

³³ Bēe manzoo, boso imele! Wa mokyela ndengye'ye pho olote etumbu eya lifelo?

³⁴ Yango mena, okyemela: Na moetomela baimosi ba Nwaphongo na bato ḅaa malondo na bateye ba Mibeko ḅaalaa. Kasi wa moboma bakyi na masengu na ná maḅanga, ḅaayoko wa ḅaboma o ikolo sa ekulusu, wa mobinda bayoko na phimbo o mangambi ma makyita ma bēe, wa mokyē mi bawiinya o nkyisi iso iinene.

³⁵ Yango mena, konyanya ngambo ya malongo ma bato baso ba bosembo ḅabomaka bēe, tata oka Abele tee nono oka Zakaliya njwana wa

Balasi, owa bomamaka onte ya Tempelo na o etumbelo.

³⁶ Nde phɛɛ na wɔ na bɛɛ ngakye: Bɛɛ wa mozwa etumbu phɔ ya maphɔɔ maso mamana!»

Yesu alesi phɔ ya Yelusaleme

³⁷ «Yelusaleme, Yelusaleme, iwe moto ookoɓome baumosi ba Nwaphongo, kobome na bato baa etomele Nwaphongo na mabanga! Kasi ingaa, mbala na mbala na mekaki eyeyangyinya wali nga, bokoangyinya soo bana bɛɛ o se ya mapapusa me, kasi bɛɛ toika anola!

³⁸ Kyeka, ingambi sa we sa moikala nde phaa.

³⁹ Na wɔ na bɛɛ ngakye: Tata nde uɲwanɲwa ye, otokule nvenɛ tee nɔnɔ wa mo wɔ bɛɛ obokye: «Okoye na nkombo ya Nkolo apambolame.»»

24

Yesu aimosi obokye Tempelo yamobukwa

¹ Waaba Yesu katɔɔ o Tempelo, baekosi bɛɛ bamba yaa wa li yo, bamba ya wɔ bɛkye: «Taakyeka bowa tonga bɛɛ Tempelo eye!»

² Emba Yesu amba ya babuyisa yokye: «Oeweni yango eso te? Nde phɛɛ na wɔ bɛɛ ngakye: Ibanga na sɔnɔsɔ etesiikale o ikolo sa siyɔkɔ, maso ma munyangwa.»

Malɔsi na minyɔko maa moyaa

³ Bobɛɛ Yesu amba ya kye zala o ikolo sa ngomba ya Baolive. Baekosi bɛɛ bamba yaa bɛɛ mampenza waali yo, bamba ya motuna bɛkye: «Taloimola maphɔɔ maawɔ we, mamokyela

imbēle ye? Tomba na eba na ye, obokye imbēle sa iyaa sa we na saa suka ya mokyisi sikokyi?»

⁴ Yesu amba ya babuyisa yokye: «Nde koebe, moto sa ekosa.

⁵ Pho bato baikye bamoyaa, na nkombo ya nga, bamowoo bekye: “Inga nali Masiya!” Bamokosa bato baikye.

⁶ Wamooka obokye mabita maeyelele na masimo ma mabita mali bisuu, bēe sa ilaa. Esengyesi obokye maphoo me makyelame, kasi mena teetaa baa suka ya mokyisi.

⁷ Ekolo yonoyo ya munwana na ekolo eeyoko, bokonzi bonobo pha munwana na bokonzi booyoko, zilo sikusi sa mobaa, na manyete mamunyingana bilele biikye.

⁸ Maphoo maso mamana ma moba ndokolo etatele ya eswete ya ibota.

⁹ Emba, bato bamotata iyeyungya, pho ya iyeweninya bolosi na iyeboma. Mabota maso ma moeyina pho ya nkombo ya nga.

¹⁰ O nkolo me, bato baikye bamolee ianola sa be, bamungyana na iyinana bēe na be.

¹¹ Baimosi babole baikye bamotokolo, bamokosa bato baikye.

¹² Pho bofe pha moleka o mokyisi, bato ete bakule zingana.

¹³ Kasi owa moitala nono o suka, amobika.

¹⁴ Simo Elaa ya bokonzi pha Nwaphongo yamoteyama o munse munso munso, pho nkyisi iso baeyokye. Emba suka yaamba yaa.»

Mooti owa inganga

15 «Wamowene ookobangye b̄ee mooti owa inganga, bo wa wo moimosi Daniele. Amoteme o elele esantu. Motangyi wa maphoo mama amasoolo!

16 Baamobaa o Yuda b̄ee elotaka o mangomba.

17 Owamobaa o ibanda, yo sakula nyolo o ingambi ikye kpa mbolo ye.

18 Na owa moba o manzabi, yo sakula butwa o lombo pho ya ikye kpa etobu ye.

19 O nkolo me, ngongo ya mobaa na babasi baaekama na na malekyele!

20 Bondere Nwaphongo, pho mokolo nwa molota b̄ee, nwe sa baa imbele sa mambula naa mokolo nwa sabata!

21 Pho nkolo me, yamobaa ya malosi maikye, mali naino bato sa wene uta waetatele ya mokyisi bowamokyela Nwaphongo tee nono lolo eye. Malosi mamoulana na mango ete makule na wene.

22 Kasi bo Nwaphongo tabukolaka nkolo ya malosi me phe, moto na monomo nde tabikiyi. Kasi Nwaphongo abukola nkolo me pho ya bato baunva yo olo.

23 O imbele me, bo moto awo na b̄ee yokye: “Kyeka, Masiya ali wawa!” Naa obokye: “Ali owo!” B̄ee samoanolela.

24 Pho bamasiya baabole na baimosi baabole bamoya baikye, bamokyela bilekyesako binene na maphoo ma ikamwa pho ya ikosa bato baaunva olo Nwaphongo.

25 Okyemela! Nambo ekyebisa na maphoo maso maamoya.

26 Yango mena, bo bawo na b̄ee b̄ekye: “Kyeka

ali o bokye!” Sakyende. Na bo bawo na b̄e b̄eke: “Kyeka, amibombi wawa!” Sabaanolela.

²⁷ Pho bookyele munkakasi o ikolo, uta biitokolo moo na biikye milangya ηwango, Nwana wa Moto amoya nde bomo.

²⁸ Waabe ebembe, biwawanga biikye biangane nde wa mo.»

Iyaa sa Nwana wa Moto

²⁹ «Bo nkolo ya malosi me yumboo, malosi masuu maalekyi mamoya. Moo ηwa mobutwa enzombi, bokombe etebokule ngala, banyaseesi bamobiya, iso iili o ikolo ya munyingana.

³⁰ Emba elembo ya Nwana wa Moto yamowenene o ikolo, o imbela me, bato ba nkyisi iso iili o munse, baamiima, waamowene b̄e Nwana wa Moto iyaa o mampata na mwiya na na nkyemo iikye.

³¹ Indule sinene samokaa, amotoma banze b̄e mbombo iso ya munse, bamoangyinya bato baso baunva yo olo.»

Ete ya ηwete ηwa fige

³² «Soso na bolaa ete ya ηwete ηwa fige. Bo molebosi, b̄e koebe obokye imbela siikyete mbuma sikokyi.

³³ Nde bomo, waamowene b̄e maphoo maso maamana makyelame, wa moeba obokye iyaa sa Nwana wa Moto sikokyi.

³⁴ Nde phele na wo na b̄e ngakye: Maphoo mama mamokyelama naino bato baayoko bali na banga lolo sataa waa.

³⁵ Ikolo na munse ya molekana kasi maloba ma nga etemalekane.»

Mokolo nwa suka ya mokyisi moebe nde Nwaphongo

³⁶ «Moto na monomō taaebe na mokolo naa imbele saamokyelama maphō mamana, ebe na banze o ikolo, ebe na ona Nwana taebe. Kyeebe nde Tata yo mampenza.

³⁷ Mokolo nwaamoyaa Nwana wa Moto, maphō mamokyelama nde bo wakyelamaka wee o imbele saaka Nowa.

³⁸ O boo pha maa izinza mokyisi munso, bato babaka bazee, banywe, balonganaka tee nōnō mokolo nwaanyolo Nowa o masuwa.

³⁹ Tebabaka baumunya na ekpele yōnyō, tee nōnō waa yaa zinza maa mokyisi munso. Imbele saamoya Nwana wa Moto ya mōba nde bomo.

⁴⁰ Bampela babale bamōba o inzabi, bamokpa monomō, bamoika monomō.

⁴¹ Babasi babale bamōba batwakyē o oomba yōnyō, bamokpa monomō, bamoika monomō.

⁴² Kyengye na bolaa, pho mokolo nwaamoya Nkolo wa bēē tomoebe.

⁴³ Umunya na bolaa lowo lolo: Bo nkolo wa ingambi aebakyi imbele ye saamoya mwibi na mokolo, nde talasi, pho ya ikyengye obokye mwibi sanyolo o ingambi se.

⁴⁴ Yango mena, bēē baka na bokyengyi imbele siso. Pho Nwana wa Moto amoyaa o imbele site siebe bēē.»

Moto wa etoma owa bosembo na ootoli na bosembo

⁴⁵ «Baka ndokolo moto wa etoma owa bosembo na ná malondo. Mokonzi nwe amoteye

kapita ya bēbi nē, phō abaphēkye ntoma o imbele siikokyi.

⁴⁶ Nkyisa boikye na kapita mona, bo mokonzi nwe aesi ya motakana kakyele etoma me.

⁴⁷ Nde phele na wō na bēe ngakye: Mokonzi mona aamophe bokonzi pha mbolo yee iso.

⁴⁸ Kasi bo kapita me tali na bosembo, aambi miwōle yokye: "Mokonzi ŋwa nga taaye zele",

⁴⁹ ambi tata iwanda bēbi nē, abuto izaa na inywa elele yōnyō na balangyi ba maleku.

⁵⁰ Emba, mokonzi nwe amoyaa mokōlo ŋwaamoba yo samoziya, naa o imbele siite siebe yo.

⁵¹ Aamowiinya, aamba mophe etumbu enene, aamunyōsa ooli banyamaḅole, o elele ekyelele bēe na ekye twe bēe mino.»

25

Ete ya bangōndo iko

¹ «Bokonzi pha ikolo phamoulana na ete ya bangōndo iko baakpaka batala ba bēe phō ya ikye vana na moloo wa bolonga.

² Onte ya be, batano babaka bibubusi, batano bayōko babaka bamalondo.

³ Baa bibubusi baphilaka nde batala, kasi iphila mautaa maikye phe.

⁴ Kasi baamalondo baphilaka batala ba bēe na ndangyi ya mauta.

⁵ Wabaa moloo wa bolonga saya izele, bēe baso baokyi ebu balasi.

⁶ Waamolengyela, moto monomo aesi ya anwana yokye: “Kyeka moloo wa bolonga, tokolo okye moyamba!”

⁷ Emba bangondo babana baesi ya umwa, batati ibongya batala ba be.

⁸ Bangondo baa bibubusi bamba ya wo na bebi na bee baa malondo bekye: “Olophe ndambo ya mauta, batala ba banga bazime.”

⁹ Baa malondo bamba ya babuyisa bekye: “Phe, bo toephe, mauta ma banga ete maakokye. Kyende omba mabe o zando.”

¹⁰ Waakye baa bibubusi ikye omba mauta, nde o sina imbele me, moloo wa bolonga aesi o sima. Batano baa malondo baamilengyelye, baesi ya nyolo na moloo wa bolonga o ingambi sa eseleko. Bamba kanga ekomba na iphungola.

¹¹ O sima, bangondo batano baa bibubusi baesi ya koma, baanwanaka bekye: “Nkolo, Nkolo, olozifole!”

¹² Kasi moloo wa bolonga amba yababuyisa yokye: “Nde phele na wo na bee ngakye: Si-eyebe.”»

¹³ Yesu amba sukya bobo: «Yango mena, nde kokyengye pho toebe na mokolo na ngonga.»

Ete ya bato baaetoma baato

¹⁴ «Iwaphongo amokyela ndokolo moto monomo kalukye ikyende o imbanga, abangyi bato bee baetoma, aesi ya bakabela baphalanga bee pho ba bakolisa.

¹⁵ Aesi ya phe moto na moto bookokyi na malondo me. Owa ebandele amophe bibende ba baphalanga bitano, owa ibale bibende ba

baphalanga bibale, emba owa iyato ebende ya phalanga γονῶν.

¹⁶ Moto wa etoma owa zwaka bibende ba baphalanga bitano, akye bakyla na mumbongu, amba kula zwa bibende bitano bisuu.

¹⁷ Owa zwaka bibende bibale, akye kyela nde bomo amba zwa bibende ba baphalanga bibale bisuu.

¹⁸ Kasi owa zwaka ebende γονῶν, akye tima ibela o manyete, abombi baphalanga baamophekye nkolo we.»

¹⁹ «Nkolo nzikye ya lekanaka, nkolo wa bato ba etoma aesi ya butwa, amba ya banga bato bée ba etoma pho bamoteya bo wakyelela bée baphalanga de.

²⁰ Moto wa etoma owa zwaka bibende ba baphalanga bitano, aesi ya moteya bitano bisuu yokye: “Nkolo, wampеkye bibende ba baphalanga bitano, kyeka nakuli bakya bibende bitano bisuu o ikolo.”

²¹ Nkolo we amba ya wo ne yokye: “Bolaa, moto wa etoma o molaa na owa bosembo. Oli na bosembo o mbolo iinkyiky naamoephe bokonzi pha mbolo inzikye. Yaka ya kumbe na nga elongo.”

²² Moto wa etoma owa zwaka bibende ba baphalanga bibale aesi ne ya moteya, amba ya wo yokye: “Nkolo, wampеkye bibende ba baphalanga bibale, kyeka, nakuli bakya bibale bisuu o ikolo.”

²³ Nkolo we amba ya wo ne yokye: “Bolaa, oli moto wa etoma o molaa na owa bosembo. Obakya na bosembo o mbolo iinkyiky, na moephe bokonzi o mbolo inzikye. Yaka ya

kumbe na nga elongo.”

²⁴ O suka moto wa etoma owa phekye béé ebende ya baphalanga yonyo aesi ne, amba ya wo yokye: “Nkolo, nga naebe obokye iwe oli moto monomo wa nkamba, konoko mbuma o elele eteyaikaka phika we.

²⁵ Nailaka, namba kye bomba baphalanga ba we o se ya manyete, kyeka baphalanga ba we béé baba.”

²⁶ Nkolo we amba ya mobuyisa yokye: “Moto wa etoma mobe na wa bokoo! Waebaka obokye nga nanoko mbuma o elele ete yaikaka nga phika.

²⁷ Kasi iwe nga nde wa kyekye bomba baphalanga banga o banki, wa iyaa nga nde naesi ya bazwa na banaa matabisi.

²⁸ Omobololo ebende ya phalanga mena, oephe ooli na bibende ba baphalanga iko.

²⁹ Pho ooli na banaa mbolo nzikye bamokula mobakysisela, kasi ooli pha, baamobololo na nwana ndambo oobakyi ne.

³⁰ Vaka moto wa etoma ootoli na ntina o ibanda, o enzombi, o elele ekyelele béé na ekye twe béé mino.”»

Mwambo nwaa suka

³¹ «Mokolo nwaamoya Nwana wa Moto na nkyemo ye, elele yonyo na banze baso, amozala o eziye ye eya bokonzi.

³² Bato baso baa munse, bamoyaangana o boo phe, aabakaba ndokolo waakabe mookosi mampate na mambosi.

33 Amoteye mampate o boloo phe, mambosi o bowee phe.

34 Emba mokonzi amba ya wɔɔ na bali o boloo phe yokye: “Bee yaka, bato bapambola Tata, ya nyɔɔ o bokonzi phaa ebongyisela be, uta o etatele ya mokyisi.

35 Pho nabaka na nzala, wampɛkye ntoma ya iza, nabaka na phowa ya maa, wampɛkye maa mainywa, nabaka mobutu, wanzambaka o mangambi ma be.

36 Nabaka bolumbu, wamba ya mpe bitobu ba ilata, nabaka na bolosi, wansalisaka, nabaka o boloko, wayakaka ya nkyeka.”

37 Bato babosembo bamba ya mobuyisa bekye: “Nkolo, imbele ye saaewenekye banga na nzala tomba ya ephe ntoma ya iza, na na phowa ya maa, tomba yaa ephe maa mainywa?

38 Imbele ye saabaka we mobutu oka banga tomba eyamba o mangambi ma banga, na bolumbu tomba ephe bitobu ba ilata?

39 Imbele ye saaewenekye banga naa bolosi naa o boloko, tomba ya kye ekyeka?”

40 Mokonzi amba ya babuyisa yokye: “Nde phele nawɔ na be ngakye: Mbala iso yaabaka be kokyele na monomɔ na baakye onte ya banaa mama, mena wabaka kokyelele nde nga.”»

41 «O sima mokonzi amba ya wɔ na baali o bowee phe yokye: “Mana o miyo ma nga, be bato baalaka be na bo! Kyende o ηwenya mote mozime, ηwa bongya be pho ya Zabulu na bakonga be!

42 Phɔ naɓaka na nzala, toikaka ya mpe ntoma ya iza, naokaka phowa ya maa, toikaka mpe maa mainywa.

43 Naɓaka mobutu toikaka nzamba, naɓaka ɓolumbu, toikaka mpe etobu ya ilata, naɓaka na ɓolɔsi na o ɓolɔko, toikaka nsunga.”

44 Emba ɓɛɛ ɓamba ya motuna ɓɛkye: “Nkolo, imbele ye saa ewenekye ɓanga na nzala naa na phowa ya maa naa mobutu naa ɓolumbu naa na ɓolɔsi naa o ɓolɔko tomba le iesunga?”

45 Mokonzi amba ɓabuyisa yokye: “Nde phɛle nawɔ na ɓɛɛ ngakye: Mbala iso yaalekye ɓɛɛ ikyelela monomɔ na ɓaakye onte ya ɓanaa mama, mena walekye ikyelela nde nga.”

46 Emba ɓato me ɓaamba zwa etumbu eteyunve, kasi ɓato ɓaabo sembo ɓamozwa ɓomɔɔ pha ɓɓɛle.»

26

Bakonzi ɓawangyi iboma Yesu

1 Waaunva Yesu iwɔ maphɔɔ masɔ mamana, amba ya wɔ na ɓaekosi ɓɛɛ yokye:

2 «Bɛɛ koebe obokye iikasi nkolo ibale phɔ ya eseleko ya Ilekana, ɓamoungya Nwana wa Moto phɔ ɓamobakye o ekulusu.»

3 Nde o sina imbele me, ɓakonzi ɓa ɓanganga ɓa Nwaphongo na ɓankumu ɓa Bayuda ɓakyeke angana o ingambi sa Kayafa, mokonzi ŋwa ɓanganga ɓa Nwaphongo.

4 Emba ɓamba wangya iyakya Yesu miibombo phɔ ya imoboma.

⁵ Bamba wɔ bɛkye: «Tolokokyi imoakya mokɔlɔ nɔwa eselekɔ phɔ bato nde batɔmbi.»

Nwasi mɔnɔmɔ asweyee malasi o moto nɔwa Yesu

⁶ Mokɔlɔ mɔnɔmɔ Yesu abaka o Betani o ingambi sa Simo, moto owabaka na bolɔsi pha maɓaa.

⁷ Waaba yo kazee, nwanɔwasi mɔnɔmɔ aesi wali yo, na molangyi o maɓokɔ nɔwa kyela bɛɛ na ná ibanga saa motuya motondi na malasi ma motuya mwikye. Amba ya masweya o moto nɔwa Yesu.

⁸ Waawene baekosi baɓona, ɓawenɛkye ɓoɓe, bamba wɔ bɛkye: «Ani ɔto malasi mamana phɔ ya'ye?

⁹ Nde ɓamaungyaki na motuya mwikye, ɓambe kpa ɓana ɓaphalanga ɓabakabele ɓabola.»

¹⁰ Yesu aɓaka maphɔɔ masɔ maabaka bɛɛ ɓawɔ. Amba ya wɔ na bɛɛ yokye: «Phɔ ya'ye bɛɛ kotungyisa nwanɔwasi oyo? Lowɔ lokyesi yo phɔ ya nga lolekyi ɓolaa.

¹¹ ɓabola ɓamɔɓa na bɛɛ wawa imbelele siso. Kasi nga esiibe na bɛɛ nkɔlɔ iso.

¹² Ambo nzɔlɔlɔ malasi o nzoto, phɔ ya imɓongya nɔnɔ wa munkunda ɓe.

¹³ Nde phele nawɔ na bɛɛ ngakye: O nkyisi iso, na o bilele bisɔ bamoumolaka bɛɛ Simo Elaa, ɓamɔɓaka ɓawɔ lowɔɔ lookyesi nwanɔwasi oyo, ɓaamba na moumunya.»

Yudasi kalukye ungya Yesu

¹⁴ ɓoɓele, mɔnɔmɔ na baekosi iko mbuka ɓabale, ookɔɓangye bɛɛ Yudasi Mosikalijota,

aesi ya kyende oka bakonzi ba banganga ba Nwaphongo.

¹⁵ Amba ya wɔ na bée yokye: «Wamumpɛ'ye, bo naekabesi Yesu?» Emba bée bamba mophɛɛ bibende ba baphalanga makoo maato.

¹⁶ Uta mokolo maamuna, Yudasi abutwaka iluka malondo ma ibaungyisa Yesu.

Yesu katome baekosi bée ilengyɛɛ eseleko ya Ilekana

¹⁷ Ya baka mokolo mwa etatele ya eseleko ya mapa maatumbe bée sa muno moulole mapa, baekosi baesi ya kye tuna Yesu bɛkye: «Kozingye obokye tokye elambela ntoma ya eseleko ya Ilekana bi?»

¹⁸ Yesu amba ya wɔ na bée yokye: «Kyende o munsongo nwa mokyisi munene o ingambi sa songolo, owɔ ne bobo: “Moteye awɔ yokye: Imbele sanga sikokyi, nga na mozaa eseleko ya Ilekana o ingambi sa we nga na baekosi ba nga.”»

¹⁹ Baekosi baamba kyela bo wa batomaka Yesu, balambi ntoma ya eseleko ya Ilekana.

²⁰ Waakoma nkokolo, Yesu amba ya kye zala elele yɔɔyɔ na baekosi bée iko mbuka babale.

²¹ Waabaka bée baze, Yesu amba ya wɔ na bée yokye: «Nde phɛɛ na wɔ na bée ngakye: Mɔnɔmɔ onte ya bée amunzungya.»

²² Baekosi bamba oka ngongo boikye, bamba tata imotuna mɔnɔmɔ na mɔnɔmɔ obokye: «Nkolo, eli nza?»

²³ Yesu amba buya yokye: «Owa munzungya eli nde mɔnɔmɔ na bée, maboko ma banga mamovana mbala yɔɔyɔ o lako.

24 Nwana wa Moto amowa nde bowa ko-mama wango pho ye o buku pha Nwaphongo. Eye ngongo pho ya moto owamoungya Nwana wa Moto. Ebakyi bolaa pho ya moto me bo tabotamaka.»

25 Yudasi moto owaamoungya amba ya motuna yokye: «Moteye, eli nga?» Yesu amba ya mobuyisa yokye: «Iwe mampenza olowoo.»

Elambo ya Nkolo

26 Waaba bee baze, Yesu akpe ipa, apha Nwaphongo melisi, asikyesi, amba kabela baekosi bee amba ya wo na bee yokye: «Imaa, zaa eye eli nzoto ya nga.»

27 Amba kula ya kpa kopho ya vinyo, apha Nwaphongo melisi aephe baekosi bee, amba ya wo yokye: «Oenywe bee baso.

28 Pho eye eli malongo ma nga, malongo ma sangola ya Nwaphongo na bato, masweye pho ya bato baikye, bazwe bolimbisi pha masumu.

29 Nawo na bee ngakye tata lolu, esikule nywa vinyo eye tee nono mokolo nwa munywa nga na bee vinyo eenyakune o Bokonzi pha Tata.» 30 Bobele, Yesu na baekosi bee, bamba ya tuba meembo ma eseleko. Waaunva bee ituba meembo, bamba ya kyende o ngomba ya Baolive.

Yesu aimosi obokye Petelo aamoangana

31 Yesu amba ya wo na baekosi bee yokye: «Nde na mokolo nwa lolu, bee baso wamundota. Pho yakomama o buku pha Nwaphongo bofo: “Namoboma mookosi wa mampate, mampate maso mamunyangwa.”

32 Yesu amba kula bakya yokye: Kasi waamokundwa nga na mokyε eziya o Galileya.»

33 Petelo amba ya wɔ nε yokye: «Na bo bεε basɔ baeloti, nga esielote.»

34 Yesu amba ya mobuyisa yokye: «Nde phele nawɔ na wε ngakye: Nde na mokolo ηwa lolɔ, soo sa botɔngɔkye iwε wa munzangana mbala iyato obokye toonzebe.»

35 Petelo amba ya kpεte kapha yokye: «Na bo ebe obokye na wee na wε elele yɔnɔyɔ, nga esieyangane.» Baekosi basɔ bamba ya wɔ nde bɔmɔ.

Yesu kabɔndε Nwaphongo o Getesemani

36 Emba Yesu amba ya koma na baekosi bεε o etiye ekyebangye bεε Getesemani. Amba ya wɔ na bεε yokye: «Bεε zala wawa, nga nakye bɔndε Nwaphongo.»

37 Amba kye na Petelo na bana babale ba Zebede baa bampele, Zake na Yoane. Bobεle atati ioka motema bolɔsi na inganga.

38 Amba ya wɔ na bεε yokye: «Ndondo ya nga etondi na ngongɔ ndokolo namowa. Ikala wawa, kengye na nga.»

39 Amba yakye ηwana itakye, akye kusama boo o se, amba tata ibɔndε Nwaphongo yokye: «Tata, bo wakokyi ikyelama, manya kɔphɔ eya bolɔsi eye. Kasi sakyela boozingyi nga, kyela nde boozingyi wε.»

40 Yesu amba ya butwa oli baekosi bεε baato, aesi ya kye batakana balasi ebuu. Amba ya wɔ na Petelo yokye: «Toikyi koka ikyengye na nga na bo ngonga yɔnɔyɔ?»

41 Kyengye, bɔndeɛ Nwaphongo phɔ bɛɛ sakaa o bimekyi ba Molemba! Moto o ndondo ye ali na phowa ya ikyela bolaa, kasi o nzoto ye tali na bokusi.»

42 Akulaka kyende mbala eya ibale, amba kye bɔndeɛ Nwaphongo yokye: «Tata, bo kopho eye teekoyi imana, elaa na enywe, wakyelame nde bozingyi we.»

43 Yesu amba kula ya butwa ooli baekosi bɛɛ, amba kula ya kye bazwa bakuli lala ebuu. Phɔ miyo ma bɛɛ mabutwaka mazito.

44 Yesu amba kula baika, akye bɔndeɛ mbala eya iyato, akulaka wo nde bomo.

45 O sima aesi ya butwa ooli baekosi bɛɛ, amba ya wo na bɛɛ yokye: «Kokule lala, komieminya? Kyeka, imbele sa iyambya Nwana wa Moto o maboko ma bato ba masumu sikokyi.

46 Temɛ, tokyende. Kyeka moto ookonzungya aesi.»

Baakye Yesu

47 Waaba Yesu kata wo, Yudasi monomo na baekosi iko mbuka babale, aesi ya koma. Aesi na bato baikye, baphisi mphata na nkpongu o maboko. Ya batomaka bakonzi ba banganga ba Nwaphongo na bankumu ba Bayuda.

48 Yudasi owa ungyaka Yesu, abateyaka iyaa samokyela yo, amba ya wo yokye: «Moto owa moyamba nga, yo mona, omoakya.»

49 Waakoma Yudasi, amba susana oli Yesu amba ya wo ne yokye: «Moteye, mbote!» Amba moyamba.

⁵⁰ Yesu amba ya mobuyisa yokye: «Nwēbi na nga, yeesi wε ya kyela, oikyele mizele.» Emba baayoko bamba ya susana, baphisi Yesu, bamba moakya.

⁵¹ Mōnōmō na baabaka na Yesu, amba gbolo mumphata nwe, ateni itoo sa moto wa etoma wa mokonzi ηwa banganga ba Nwaphongo.

⁵² Yesu amba ya wō ne yokye: «Buya mumphata ηwa wε o ekokolo. Phō bato basō baanwane na mumphata, bawe nde na mumphata.

⁵³ Toebe obokye bo naongyi mbengo oka Tata, nde unwanwa eye amuntomela baanzelu baikye ileka batayo iko mbuka ibale ya batuluku.

⁵⁴ Kasi bonakyesi babona, maphōo makomama o buku pha Nwaphongo mamokokyisama ndengye'ye? Phō wakomama obokye maphōo masō masengyesi ikyelama nde babona.»

⁵⁵ O sima Yesu amba ya wō na bato basō yokye: «Emba iya nzakya kombe yaa na mphata na ná nkpongu o maboko ndokolo nga nali nde moibi? Nkolo iso nabaka nazale o Tempelo phō ya iteya toikaka na nzakya.

⁵⁶ Kasi masō mama makyelame phō ya ikokya maloba ma baimosi ba Nwaphongo maakoma bēε o buku pha Nwaphongo.» Emba baekosi basō baikyi moika, baloti.

Yesu kasambe o ikyita siinεnε

⁵⁷ Bato baakyaka Yesu, bamba yakye ne oka Kayafa, mokonzi ηwa banganga ba Nwaphongo, waanganaka baamibeko na bankumu.

58 Petelo abaka kabengye Yesu na itakye tee nɔnɔ wakye yo nyɔlɔ o lophango la mokonzi nwa banganga ba Nwaphongo. Omɔ, amba kye zala elele yɔnɔyɔ na basinzili, phɔ ya ikyeka ndengye eya mosuka lowɔɔ mɛ.

59 Bakonzi ba banganga ba Nwaphongo na bato basɔ ba ikyita siinene babaka balukye bato baakoky ikatela Yesu maphɔɔ phɔ bamoingya.

60 Kasi na bo bato baikye bayakaka ya mokatela maphɔɔ, tebaika zwa na lowɔ lonɔlɔ tee sima bato babale bamba yaa,

61 baesi ya wɔ bekye: «Moto oyo awɔkɔ yokye: Nga na mouwola Tempelo ya Nwaphongo namba etonga sima ya nkɔlɔ iyato.»

62 Emba mokonzi nwa banganga ba Nwaphongo aesi ya tɛmɛ, amba ya tuna Yesu yokye: «Toobuya na iikyeephunde bato baba?»

63 Kasi Yesu aikalaka nde bɔse. Mokonzi nwa banganga ba Nwaphongo akulaka wɔ nɛ yokye: «Kata seleka na nkombo ya Nwaphongo oli na bɔmɔɔ! Oloimole bo oli Masiya, Nwana wa Nwaphongo?»

64 Yesu amba mobuyisa yokye: «Iwɛ mampenza olowɔɔ. Kasi nawɔ na bɛɛ ngakye: Tata unwanwa, wamowene Nwana wa Moto azasi o boloo pha Nwaphongo owa mwiya, waamba na mowene kaye onte ya mampata!»

65 Emba mokonzi nwa banganga ba Nwaphongo, amba ya kakola bitobu bɛɛ balataka yo, amba ya wɔ yokye: «Atosi Nwaphongo! Tolokuli sengyela na manzoka! Ooky i bootosi yo Nwaphongo.

66 BÈÈ koununya bo?» Bamba mobuyisa ðekye: «Asengyesi iwaa!»

67 O sima mε, bamba motowa matee o ðoo, bamba mowanda mankutu, ðaayoko bamba mowanda bingyete.

68 Bamba wo ðekye: «Iwε Masiya, teya obokye oli moimosi! Ooewandi nza?»

Petelo aanga Yesu

69 Petelo abaka azasi o ibanda o lophango. Nwanwasi monomo wa etoma, amba ya wo ne yokye: «Na we obakyi na Yesu, moto wa Galileya.»

70 Kasi yo amba angana o miyo ma bato baso, amba wo yokye: «Maphoo manvole we mamana, nga siimaebe.»

71 Sima Petelo aesi ya kye teme o munoko nwa lophango. Moto wa etoma mosuu wa nwanwasi aesi ya mowene, amba ya wo na baabaka wamo yokye: «Moto oyo abakyi na Yesu owa Nazarete.»

72 Petelo akulaka angana, amba kata na seleka yokye: «Siebe moto mona.»

73 Sakoko bato baabaka wamo baesi oli Petelo, bamba ya wo ne ðekye: «Nde phele, oli monomo na ðe, pho ewosi ya we kyeephunde!»

74 Emba Petelo amba ya anwana yokye: «Seleka Nzambi, siebe moto mona. Bo nakate, Nwaphongo ampe etumbu!» Nde o sina imbele me, soo eesi ya tongo.

75 Emba Petelo amba ya umunya maphoo maawoko Yesu ne obokye: «Soo sa botongokye, wamunzangana mbala iyato obokye we

toonzebe.» Bobele Petelo amba ya tokolo na ilela na ngongo boikye.

27

Yesu akye samba oka Pilata

¹ Waa moyelo, bakonzi ba banganga ba Nwaphongo baso naa bankumu ba Bayuda, baanga, bamba okana obokye babome Yesu.

² Bamba mokanga maphanga, bamba yakyε ne oka Pilata moangyesi nwa Bayuda.

Iwaa sa Yudasi

³ Yudasi moto owa moungyaka, wa oka yo obokye batenesi Yesu bolombe pha iwaa, aokaka bolosi boikye o ndondo ye, amba ya kye buyisa mokonzi nwa banganga ba Nwaphongo na bankumu bibende ba baphalanga makoo maato, biamophekye be.

⁴ Amba ya wo na beε yokye: «Nakyesi bobε pho naungye moto ootoli na lowoo.» Kasi beε bamba ya mobuyisa bekye: «Mena nde lowoo la we! Lowoo lalona telokyekyi banga!»

⁵ Emba Yudasi amba vaka bana baphalanga o Tempelo, nono wakye yo miingya.

⁶ Bakonzi ba banganga ba Nwaphongo baongoko baphalanga me, bamba ya wo bekye: «Mibeko ma banga temianole inyosa baphalanga baa ndengye eye o ebombelo ya Tempelo, pho eli baphalanga baatangya malongo ma moto.»

⁷ Waaunva beε iokana, bamba ya baomba na inzabi sa moto monomo owa baka kakyele manoko pho bakundakye na babutu baawe omo.

⁸ Yango mena, babangye inzabi me nono lolo eye: «Inzabi sa malongo.»

⁹ Wakyelamaka bowawoko moimosi Yilimiya yokye: «Bakpee bibende ba baphalanga mako maato, ye eli motuya nwaaphekye bato ba Isalayele pho ye,

¹⁰ bamba baomba na inzabi sa moto okokyele manoko bo wa nvolekye Nkolo.»

Pilata atuni Yesu

¹¹ Yesu akye samba o boo pha Pilata. Pilata amba ya motuna yokye: «Iwe oli mokonzi nwa Bayuda?» Yesu amba ya mobuyisa yokye: «Iwe mampenza o lowoo.»

¹² Kasi imbele saabaka bakonzi ba banganga ba Nwaphongo na bankumu bamophunde, iyo taikaka buya na lowoo.

¹³ Emba Pilata amba kula motuna yokye: «Tookye maphoo maikye maephunde na be?»

¹⁴ Kasi Yesu taika na mobuyisa na lowoo lonolo. Yango mena Pilata akamwaka na boikye.

Pilata atenesi Yesu bolombe pha iwaa

¹⁵ O biseleko biso bya Ilekana, mwangyesi amelekye ikandola moto wa boloko monomo oozingyi bato.

¹⁶ O imbele me, moto monomo abaka o boloko, aebanaka na boikye, nkombo ye Yesu Balaba.

¹⁷ Pilata amba ya tuna bato baanganaka yokye: «Be kizingye obokye naekandolele nza? Yesu Balaba nde Yesu okobangye bee Klisto?»

¹⁸ Pilata aebaka na bolaa obokye, baphundaka Yesu oka ye nde pho ya zuwa.

19 Waaba Pilata azasi kasambisa Yesu, ηwasi we amba motomela maloba yokye: «Sanyolo o lowoo la moto mona, tali na lowoo. Lolo na mokolo naweni bolosi boikye o ndoto pho ye.»

20 Bakonzi ba banganga ba Nwaphongo na bankumu, baphekya bato malondo pho baongye Pilata akandole Balaba, ahome Yesu.

21 Pilata akulaka batuna yokye: «Onte ya bato babale baba kozingye obokye naekandolele nza?» Bamba mobuyisa bekye: «Balaba!»

22 Emba Pilata amba kula ya batuna yokye: «Ka nakyele bo na Yesu oko bangye beε Klisto?» Bamba ya buya bekye: «Omobakye o ekulusu!»

23 Pilata amba ya wo na beε yokye: «Bobe ye bookyesi yo?» Kasi beε batataka iyanwana na bokusi mpenza bekye: «Omobakye o ekulusu!»

24 Waawene Pilata obokye takokyi ikyela na ekpele yonyo, bato balukye itombo, aesi ya kpa maa akunyosi see o miyo na bato baso amba ya wo yokye: «Iwaa sa moto oyo tesili o maboko ma nga! Mena nde lowoo la beε.»

25 Bato baso bamba ya buya bekye: «Lowo phe, malongo me mabee o ikolo sa banga na bana ba banga.»

26 Emba Pilata amba ya bakandolela Balaba, atomi bawande Yesu phimbo, amba ba phe Yesu obokye bamobakye o ekulusu.

Batuluku baekye Yesu

27 Batuluku ba Pilata baesi ya kye na Yesu o lophango la moangyesi. Emba batayo mobimba ya batuluku bamba ya molungya.

28 Bamba mumanya bitobu, bamba molasa nde munkoto mɔnɔmɔ nwa mangola.

29 Sima, baesi ya tonga eboko yɔnɔyɔ ya milɔ, bamba molasa yango o moto ndokolo mokonzi. Bamba mophisa nwan munkyɛkyɛ o eboko eya boloo, bamba butwa imokusamela na imoɛkyɛ, bambe wɔ bɛkyɛ: «Mbote, mokonzi nwa Bayuda!»

30 Bamba motowa matee, baesi ya kpa muna munkyɛkyɛ nwaamophisaka bɛɛ o eboko, babuto imobinda nwanango o moto.

31 Waunva bɛɛ imoɛkyɛ, baesi ya mumanya munkoto nwanmolasa bɛ, bamba mobuyisa bitobu bɛ. Emba bamba kye ne ikye mobaka o ekulusu.

Babakyi Yesu o ekulusu

32 Waatɔkɔlɔ bɛɛ o mokyisi, bamba kye vana na moto mɔnɔmɔ wa Sirene, nkombo ye Simo, batuluku bamotomisaka na bokusi obokye anyanya ekulusu ya Yesu.

33 Bamba ya koma o elele ekyebangye bɛɛ Gologota, kyelukye iwɔ obokye: «Elele eya engyɛngyɛ.»

34 Omɔ bamba phe Yesu maleku maangyinya bɛɛ na munɔ nwa bololo, waamameka yo amba lɛɛ imanywa.

35 Waaunva bɛɛ imobakya o ekulusu, bamba ya maa mbese phɔ ya ikaba bitobu bɛ.

36 Sima, bamba ya zala wamɔ phɔ ya imokyɛngyɛ.

37 O ikolo sa moto nwe, bakomaka ntina ya iwaa se obokye: «Oyo Yesu, mokonzi nwa Bayuda».

38 Babakaka na baibi babale o ekulusu, ona o boloo phe, oomoyoko o bowee phe.

39 Baalekane bamotolaka, banyingye na nzoto,

40 bamba ya wo ne bekye: «Iwe owalukaka iyuwola Tempelo, ombe etonga na nkolo iyato, omibikya booli Nwana wa Nwaphongo, ombe na uta o ekulusu.»

41 Bakonzi ba banganga ba Nwaphongo na bateye ba Mibeko na bankumu bamoekyekye nde bomo, bamba ya wo bekye:

42 «Abikyaka bato basuu, kasi takoyi imibikya yo mampenza! Ali mokonzi nwa Isalayee? Aute unwanwa o ekulusu, toomba moanola.

43 Ambyaka motema nwe munsu oka Nwaphongo, nde kawo yokye: “Nali Nwana wa Nwaphongo.” Ka bo Nwaphongo kamozingye amobikya unwanwa eye!»

44 Ebe na baibi baabakaka bee o ekulusu phenephe na Yesu bamotolaka nde bomo.

Iwaa sa Yesu

45 Waakoma bunya i moto, enzombi yeesi ya ziba mokyisi munsu, tee nono o ngonga ya iyato eya nkokolo.

46 Phenephe na ngonga eya iyato, Yesu amba ya anwana na bokusi yokye: «Eli, Eli, lema sabakatani?» Kyelukye iwu obokye: «Nwaphongo wa nga! Nwaphongo wa nga! Pho ya'ye onde?»

47 Bato basuu baatemekye wamu, bamookyi, bamba ya wo bekye: «Kabangye moimosi Eliya!»

⁴⁸ Μονομο na βέε amba kyilingana izele, akye nyinya inyuka o maleku maangaa. Asitingye o songya ya mungbalango amba siphε Yesu obokye anywe.

⁴⁹ Kasi bayoko bamba wo bekye: «Ka tokyekye bo Eliya amoya mobikya!»

⁵⁰ Emba Yesu ambakula anwana nwangye mokusi nono waakata yo motema.

⁵¹ Nde o sina imbele me, etobu eya lengyekye βέε o Tempelo, o soo pha elele elekya bosanto, yakakwaka na mibale uta o ikolo nono o se. Manyete manyinganaka, mabanga mawaye,*

⁵² malita maziboo, basantu ba Nwaphongo baikye baawaka bakundoo,

⁵³ batokosi o malita, emba sima ya ikundwa sa Yesu bamba ya nyolo o Yelusaleme. Omo bato baikye babawenekye.

⁵⁴ Batuluku baabaka bakyengyele Yesu ebe na mokonzi wa be, wawene βέε manyete manyingaa na maphoo maso maabaka malekane, bamba wene inganga siikye, bamba wo bekye: «Nde phele, moto oyo abakya Nwana wa Nwaphongo!»

⁵⁵ Babasi baikye baabaka bakyemikye ne uta o Galileya pho ya imosunga, batemekye na βέε wamo, bakyekye na itakye.

⁵⁶ Onte ya βέε, yabaka Maliya owa Magadala na ndoo ye nyango wa Zake na Zozefu, ebe na nyango wa bana ba Zebede.

Ikundama sa Yesu

* 27:51 27.51 Lokala

⁵⁷ Wa nkɔkɔlɔ, moto mɔnɔmɔ wa ezwele amba yaa, nkɔmbo ye Zozefu. Autaka o Alimataya, ne abaka moekosi wa Yesu.

⁵⁸ Akyekye oka Pilata ikye moonga ebembe ya Yesu. Pilata amba wo obokye bamophe yango.

⁵⁹ Emba Zozefu amba ekpa, aezingyi na etobu eenyakune.

⁶⁰ Amba yakye enyɔsa o ilita saatimaka yo o mabanga phɔ ye mampenza. Bobele amba ya ukaa ibanga sinene phɔ ya iziba munɔkɔ nwa ilita, nɔnɔ wa butwa yo.

⁶¹ Maliya owa Magadala na ndoo ye bazalaka o boo pha ilita.

Batuluku bakyyengyele ilita sa Yesu

⁶² Sima ya mokɔlɔ mɔnɔmɔ, yabaka mokɔlɔ nwa sabata, bakonzi ba banganga ba Nwaphongo na Bafalisayi bamba ya kyende oka Pilata.

⁶³ Bamba wo ne bekye: «Mokonzi, toumunya maphɔɔ maawɔkɔ nyabɔɔle mɔna, wataka baa yo na bomɔɔ. Awɔkɔ yokye: “Namokundwa sima ya nkɔlɔ iyato.”

⁶⁴ Ebɔngyi obokye otome bato bakyyengyele ilita nkɔlɔ iyato, bo phe, baekosi beɛ bamoyaa iba ebembe, emba sima bamba woɔ na bato obokye: “Akundo.” Bɔɔle babona phamoleka phaa phanza na bofe.»

⁶⁵ Pilata amba babuyisa yokye: «Kpa batuluku, kyende kyengyele ilita boumunye beɛ.»

⁶⁶ Emba bamba ya kye balimisa ibanga me na bokusi. Bamba ikaa batuluku phɔ basikyengyele.

28

Ikundwa sa Yesu

¹ Mokolo ŋwa sabata molekaa, na munkukutu, Maliya owa Magadala na ndoo ye, nyango wa Zake na Zozefu, bakulaka kye kyeka ilita.

² Na mbala γυναικες, manyete matati inyingana na bokusi. Mwanze wa Nkolo auti o ikolo, aesi ya manya ibanga, amba zala o ikolo sa sango. ³ Boo pheε phabaka bongyengye ndokolo munkakasi, bitobu δεε babaka mpembe peε.

⁴ Batuluku bawenekye inganga, babuto itekyenεε, babutwaka ndokolo bifembe.

⁵ Mwanze amba ya wɔ na babasi yokye: «Bεε salota, naebe obokye kolukye Yesu owa bomaka bεε o ekulusu.

⁶ Wawa tali! Ambo kundwa bo wawoko yo. Yaka ya kye kyeka elele eebakyi nzoto ye.

⁷ Kyende kye imola baekosi δεε izele obokye ambo kundwa, “akye unwanwa eye o boo pha bεε o Galileya. Wamokye mowene omɔ.” Mena eli simo ayakakyi nga ya ieimola.»

⁸ Bamba mana o ilita izele, babaka na inganga siikye, kasi mandondo ma bεε matondaka na nkyisa, bamba ya kye na mbangu iimola simo me oka baekosi ba Yesu.

⁹ Na mbala γυναικες Yesu aesi ya tokolele basi me, amba ya wɔ na bεε yokye: «Mbote ya δεε!» Bεε bamba susana phenephε, bamba kusama, bamophisi o makolo.

¹⁰ Yesu amba ya wɔ na bεε yokye: «Bεε saila, kyende kyeimola bebi na nga, bakyende o Galileya, bamokye nvene omɔ.»

Batuluku bakye imola simo oka bakonzi

¹¹ Waaba babasi babutwe, batuluku baabaka bakyingyele ilita bamba ya butwa o lombo, pho ya ikyemola bakonzi ba banganga ba Nwaphongo maphoo maso malekanaka.

¹² Bakonzi ba banganga ba Nwaphongo na bankumu, bamba angana pho ya iyoka, emba bamba phe batuluku baphalanga baikye.

¹³ Bamba ya wo na bee obokye: «Owoko bobo: Baekosi bee baesi ya ibaa ebembe ye na mokolo imbele siibee banga na ebuu.

¹⁴ Bo Pilata aokyi lowoo me, toomuya moo, bee salota etaekyele ekpele.»

¹⁵ Batuluku baesi ya kpa baphalanga, bakyesi nde bo wawoko bee na bee. Yango mena isololo sisi sanyangwaka onte ya Bayuda tee nono lolo eye.

Yesu atokolesi baekosi bee

¹⁶ Baekosi iko na monomo baesi ya kyende o ngomba ya Galileya, eyawoko Yesu obokye amokye vana na bee omo.

¹⁷ Waamowene be, bamba mokusamela. Kasi bayoko onte ya bee bataaka baa na ziko.

¹⁸ Yesu amba susana phenephe na be, amba ya wo na bee yokye: «Nwaphongo ampe bokonzi bosoo pha ikolo na pha o se.

¹⁹ Yango mena, bee kyende oka bato baa nkyisi iso ya mokyisi, obabuya baekosi banga, obabatisa na nkombo ya Tata, ya Nwana na ya Bolobo.

20 Obateya obokye bakumole mitindo mia ephēkye nga. Oebe obokye nali na βέε nkɔlɔ iso tee nono o suka ya mokyisi.»

Lobala NT

Lobala: Sangola Eenyakune New Testament

copyright © 2018 Wycliffe Bible Translators, Inc.

Language: (Lobala)

Contributor: Wycliffe Bible Translators, Inc.

All rights reserved.

2025-05-10

PDF generated using Haiola and XeLaTeX on 10 May 2025 from source files dated 10 May 2025

45dc5a8e-f513-5ba3-aad6-e48bd1d5b563